



Wantok Niuspepa i tok sori tru long paulim taitel bilong Hon-orabel Spika bilong Palamen bilong Papua Niugini, na Memba bilong Finschhafen, Theodore Zurenuoc MP, las wik long fran pes pointa olsem, 'Sif Seketeri bilong Palamen'. Mipela salim tok sori long Opis bilong Spika long dispela asua.

BEK 2 SKUL PROMOSEN!
PLANTI MOA

BAIM 2PELA SKUL BEK NA KISIM NARAPELA FRI
PROMOSEN BAI ISTAP INAP NAMBA 28 DEI BILONG MUN FEBUERI 2015

THEODIST LTD
THE STATIONERY SUPERMARKET
Waigani Drive, POM
Ph: 313 9800
sales@theodist.com.pg
Markham Road, LAE
Ph: 472 5488
saleslae@theodist.com.pg

Ol sios i egensim lo bilong kilim ol kalabus

Esther Bralyn Wani
UPNG sumatin i raitim

KATOLIK Bisop Konprens (CBC)
wantaim ol Sios Lida Kaunsil bilong

PNG Sios Patnasip Program i no wanbel long dispela lo bilong kilim ol kalabus.
Ol sios lida i mekim dispela toktok bihain long Seketeri bilong Dipatmen

ov Jastis na Atoni-Jenerel Dokta Lawrence Kalinoe i tok kebinet i tok orait long kamapim inta-ejensi komiti long gohet long dispela lo.
Kot i salim 13 kalabusman long dai

na ol i wet i stap nau long gavman i kilim ol.

I go moa long pes 2...



Mipela Sot liklik: Spika bilong palamen, Hon Theodore Zurenoc wantaim ol wokman bilong em i redi long go insait long semba long opim nam-bawan sindaun bilong 2015 palamen sesen. Spika i sot long ol Klak bilong palamen long wanem, klak bilong palamen i stap long kot, namba tu bilong em i bin dai long pinis bilong las yia. Nau em yang-pela eking klak i sindaun long lukautim dispela sesen bilong 2015. L-R Lalai Vali (Sergent-at-arms), Palamen Spika Theo Zurenouc, Basil Kambuliagen (eking fes klak) na Kala Aufa (eking klak). **Poto Nicky Bernard.**

INSAIT

Dipatmen bilong Haia Edukesen Rises Saiens na Teknoloji Tok save insait - P8,9 na 20

Singaut long gavman daunim inkam takis- p3

Wewak Daiosis i gat nupela bisop - P12

UNLIMITED FREE CALLS
Bundled with SMS and Data.
Dial *123*15# to subscribe now!
Valid for 14 days.
bmobile | vodafone
Power to you
For more information contact us now
Customer Care 76003555

UNLIMITED FREE CALLS
Between Bmobile-Vodafone numbers

30 mins voice
Any network

30 MB data

30 SMS
Any network

Pay only K15

FINEPRINT: Just keep on talking & enjoy our services.

Vot i no gat bilip i ken kamap

Stanley Nondol i raitim

VOT i no gat bilip i no kamap yet taim Palamen i bung long Tunde tasol em i ken kamap yet.

Oposisen i tok maski em i no gat inap namba long rausim gavman, graun wok i kamap yet long traim testim strong bilong O'Neill gavman.

Oposisen Lida, Don Polye i tok, ol nисуpeka ripot olsem em i laik kamapim vot i no gat bilip long O'Neill gavman long dispela wik i no tru. Tasol em i tok em i mekim wok bilong em long traim testim gavman aninit long lo.

Mista Polye i tok maski em i no gat inap namba, em bai traim testim O'Neill long flo bilong Palamen na lo i tok orait long dispela i ken kamap.

Rot bilong kamapim vot i no gat bilip em long kisim siknetsa bilong ol memba long mak bilong 20 na bai i givim wan mun notis long spika bilong Palamen.

Na ol i mas makim long notis pepa husat bai kamap kendidet bilong Praim Minista.

Oposisen i gat 7-pela memba nau. Gavana bilong Ora, Garry Juffa i joinim ol long dispela wik

Tunde na kisim namba go antap long 8.

Mista Polye i tok em i gat 21 memba pinis long sait bilong em na dispela em inap namba long givim notis long spika na i ken traim kamapim vot i no gat bilip taim Palamen i bung long namba tu taim long mun Mas.

Long nau yet, Oposisen i no givim notis pepa long Palamen na em bai hat long Oposisen traim long kamapim vot bikos spika bai no inap larim dispela i kamap aninit long lo.

Praim Minista, Peter O'Neill i tok

taim bilong kamapim vot i no gat bilip em i pinis. Tasol Oposisen i tok i gat sampela hap bilong lo i stap we ol i ken yusim long kamapim na i tok taim i no pinis na ol i wok yet long traim namba gem.

Ol toktok kam aut long gavman olsem posisen bilong Nesenel Alaiens Pati long kolisin gavman i no strong tumas.

Oposisen i lukluk long wok bung wantaim Nesenel Alaiens Pati long kamapim nupela gavman na long dispela wik i lukim papa bilong NA Pati, Sir Michael Somare i no wanbel long sampela rot gavman i menesim kantri.



Oposisen Lida, Don Polye.

PNG i no gat gutpela rekot bilong ol sitisen: Basil

Stanley Nondol i raitim

DEPUTI Oposisen lida, Sam Basil i tok bikipela namba bilong PNG sitisen i no gat rekot long sistem bilong gavman long soim olsem ol i sitisen bilong kantri aninit long lo. Em i tok gavman i save toktok nating na mekim plen na yusim mani long ol developmen program.

Mista Basil i tok long helpim ol sitisen long luksave olsem ol i sitisen, wok bilong Nesenel ID program em i namba wan na olgeta i mas sapotim long projek i pinis hariap na olgeta sitisen i mas gat ID kat.

Em i tok taim olgeta sitisen i gat ID kat, bai mekim wok bilong Intenel Revenu Komisin (IRC) i isi long kisim inkam takis long ol wokman.

Mista Basil i mekim dispela toktok long Palamen asde long sapotim wok bilong Dipatmen bilong Nesenel Plening long NID na sapotim Gavana Garry Juffa long daunim inkam takis long kantri.

Mista Basil i tok, bikos kantri i no gat gutpela data beis na rekot sistem, em i hat long IRC na ol ejensi long kisim takis bilong wokman na tu ol bisnis haus.

Em i tok planti ol bisnis na kampani i no baim takis gut tasol em i hat long gavman i luksave bikos i no gat gutpela rekot na data beis long painim aut.

Ol bisnis olsem PMV, stua bisnis na sampela i no save baim inkam takis long gavman. Mista Basil i tok planti ol stua bisnis i no save baim takis gut.

"Em i hat long save hamas mani PMV na stua bisnis i mekim bikos

no gat wanpela sistem i stap long luksave hamas mani ol i kisim long bisnis. Taim ol i go putim mani long benk tasol i gat rekot na gavman i save askim ol long baim takis."Mista Basil i tok.

Mista Basil i singaut tu long gav-

man i apim pe bilong ol woklain long IRC, kastom na ol ejensi bilong gavman i save kisim takis. Em i tok mekim olsem bai daunim braiberi pasin we sampela taim ol wokman i kisim braiberi mani na i no kisim takis long ol kampani.

Em i tok gavman tu i mas putim strongpela lo long mekim save long husat wokman i kisim braiberi mani long ol kampani long abrusim inkam takis bilong gavman.

Praim Minista Peter O'Neill i tok planti kampani i no save baim takis

na i hat long painim aut bikos ol i no gat takis fail namba long IRC.

Em i tok gavman IPA, IRC na benk bai wok bung long painim aut husat kampani i no gat takis fail long IRC bai benk i no inap larim ol i opim akaun.



OL lain Katolik Profesenel Sosaiti memba i toktok long ol niuslain long sanap bilong ol long det penelti.

Poto: Nicky Bernard

Ol sios i egensim lo bilong kilim ol kalabus

I kam long pes 1...

Dokta Kalinoe i tok sampela lain i bin egensim lo bilong kilim man i dai bikos em i pasin bilong ol enimal na i no Kristen pasin. Tasol em i tok gavman i save olsem taim ol i yusim dispela lo bai ol sitisen bilong PNG i no inap brukim ol lo we ol inap dai long han bilong gavman.

CBC na ol Sios Lida Kaunsil bilong PNG Sios Patnasip Program i tok dispela pasin i egensim Baibel na lo bilong Kristen. Ol i tok moa olsem Baibel i tok tambu long kilim man i dai na gavman o judiseri i no gat rait long kilim man i dai, God tasol i ken mekim

olsem bikos em yet i givim laip.

Ol i tok moa olsem Olpela Testamen em i toktok long pasin bilong bekim, tasol long Nupela Testamen Jisas i tok 'laikim birua bilong yu na pre long husat i mekim nogut long yu.'

CBC i tok moa olsem long ol narapela kantri we ol i save kilim ol kalabus, namba bilong ol lain i brukim lo i no save go daun. Ol i tok PNG bai wankain tasol olsem na ol i laik ol kot i salim ol i go kalabus inap ol i dai na ol i mas mekim bikipela wok tru taim ol i stap long kalabus.

Deputi Siaman bilong ol sios na Asbisop bilong Pot Mosbi, John Ribat i makim maus bilong Katolik Sios na ol sios i tok husat bai kilim ol dispela 13 man i wetim long dai. Em i askim sapos ol man long PNG yet o ol man bilong narapela kantri i mekim dispela wok bikos long pasin bilong PNG long bekim birua. Em I tok laip bilong ol famili na husat i go pas long kilim ol kalabus bai i no inap seif.

Ol sios i save olsem gavman i bin kamapim dispela lo long 2013 we Atoni Jenerel na Jastis Minista, Kerenga Kua i

bin tok save. Tasol ol sios i tok i gat ol narapela wei long stretim dispela hevi. Ol i tok yumi kolim yumi yet Kristen kantri tasol yumi laik brukim lo bilong Kristen.

I gat 13 kalabusman i wet i stap nau long dai na inta-ejensi komiti i bung na givim ripot bilong ol i go long Palamen.

Ol memba bilong dispela komiti em, Dipatmen ov Jastis na Atoni Jenerel, Koreksenenel Sevis, Polis, Helt, Komyuniti Developmen, Nesenel Plening na Monitoring, na Nesenel Judiseri Staf Sevis.

Singaut long gavman daunim inkam takis



Gavana bilong Oro, Garry Juffa

Stanley Nondol i raitim

GAVANA bilong Oro, Garry Juffa i singaut long gavman i daunim inkam takis bilong ol wokman meri long kantri. Na em i askim wanem taim bai Minista bilong Tresari Patrick Pruaitch i givim ripot bilong Takis Rivui Komiti i go aut long pablik.

Gavana Juff i mekim dispela singaut long Palamen na i tok gavman i kisim bikipela mani long takis long pe bilong ol wok lain na planti manmeri i kisim taim bikos bikipela mani i go long takis long gavman.

Wan wan wokman na meri long kantri i save baim 35 pesen long pe bilong ol i go long gavman olsem takis aninit long takis lo.

Gavana Juffa i bin toktok wantaim Intenel Revenu Komisin (IRC) na i painim aut olsem IRC i mekim rikomendesen o askim gavman long daunim inkam takis tasol opis bilong Tresari i pasim dispela. Na em i askim Minista bilong Tresari, Patrick Pruaitch long tok klia.

Mista Juffa i tok IRC i askim Tresari dipatmen long daunim inkam takis long 35 pesen kam daun long 20 pesen. Em i tok politiks long opis bilong Minista bilong Tresari i pasim dispela long karim kaikai.

Minista bilong Tresari, Patrick Pruaitch i tok em i no save long dispela pepa we IRC i salim kam long opis bilong em long daunim inkam takis.

Mista Pruaitch i tok em bai painim aut long dispela na tok save bihain.

Em i tok ripot bilong Takis Rivui Komiti i pinis tasol em bai painim aut sapos ol i pinis na i redi long em bai givim i go long Palamen.

Mista Pruaitch i tok inkam takis em wanpela bilong ol poin we Takis Rivui Komiti bin wok long en na pablik bai save taim em i givim ripot long Palamen.

Long wankain taim, Praim Minista Peter O'Neill i tok PNG i gat liklik klostu long 200,000 wok fos long kisim gavman takis na dispela namba i no bikipela.

Em i tok long 2014, IRC bin mekim K600 milien long inkam takis na sapotim gavman long 2015 baset. Mista O'Neill i tok i gat nid long kantri bai wok strong long apim namba bilong wok fos long gavman i ken kisim inap takis long ranim kantri.

Mista O'Neill i tok tenk yu long IRC na Kastom long gutpela wok long 2014 we lukim gavman i kisim bikipela takis.

DET PENELTI: Asbisop bilong Pot Mosbi Katolik Asdaiosis, John Ribat na Jenerel Seke-teri bilong Katolik Bisops Konprens, Pater Victor Roche SVD i tok-tok long det penelti em Katolik Sios i egensim.

Poto: Esther Wani



Project fees, New uniforms, Text books? Start the year on a good note with all your back to school needs financed through a

BSP PERSONAL LOAN

✓ 100% unsecured loan
✓ Flexible repayment terms

✓ Loan up to K50,000
✓ Quick approval



320 1212 / 7030 1212 - 24/7
servicebsp@bsp.com.pg
www.bsp.com.pg



Official Sponsor of the 2015 Pacific Games

Oposisen egensim Telikom baim EMTV

Oposisen lida, Don Polye i egensim Telikom PNG i baim EMTV na em i singaut long gavman long givim EMTV go bek long mama kampani bilong en.

Telikom PNG, i tokaut long las wik olsem em i baim EMTV long mani inap long mak bilong K27 milien.

Tasol Mista Polye i tok EMTV em wanpela nius kampani i save givim sevis bilong infomesen long pablik

na taim gavman i tekova bai i no stret bikos nius i ken kamap wan-sait na bai gavman i kontrolim.

Mista Polye i tok nius kampani i mas stap independen na gavman i no ken baim na kontrolim.

Em i singaut long gavman long givim EMTV go bek long kampani bilong Fiji na nius na infomesen i ken ran fri we gavman o wanpela man i no inap kontrolim.

Mista Polye i tok wok bilong gav-

man em long givim sapot long sevis olsem gutpela pawa saplai, transpot infrastraksa na ol arapela sevis bilong pablik.

Em i tok pablik praivet patnasip em i wanpela gutpela rot bilong sapotim ol bisnis na i no long baim bisnis bilong pablik na ranim.

Oposisen lida i tok polisi bilong oposisen em long sapotim praivet bisnis na i no long gavman bai baim bisnis na mekim planti bisnis.



Oposisen lida, Don Polye.

BSP pasim rurel brens long Madang

BIKPELA Komesel benk long kantri, Bank South Pacific (BSP) i tokaut olsem em i pasim 8-pela brens insait long las 12-pela mun bikos planti raskol pasin i kamap.

BSP rurel brens long Zenag, Okapa, Kerevat, Banz, Tambul na Minj i pas long liklik taim na brens long Tambul i pas olgeta. BSP i bin pasin pinis Gumini na Laigaim brens long 2013.

BSP i tok las wik em i pasim Walium brens long Madang provins bikos raskol pasin bilong brukim benk na stil i bin kamap.

BSP i tok em i no gutpela pasin long kamapim raskol long ol rurel

brens bikos benking sevis em bikipela samting long ol pipel long rurel eria long mekim laip bilong ol i kamap isi. BSP i tok benk i save yusim ki kad na ilektronik na mobail benking trenseksen na i putim liklik mani long benk long ol rurel brens long ol kastoma i ken rausim.

Benk i tok sapos i no gat rurel brens bai ol pipel i go longpela rot i go long taun long yusim benking sevis na ol bai baim bikipela mani long PMV.

BSP i tok em i promotim rurel benking na fainensel inklusen sevis i go long planti manmeri long

rurel eria. Benk i laik planti pipel long ples i yusim benk sevis long stap insait long fomal sekta bilong ol bisnis. Tasol ol liklik lain tasol i kamapim raskol pasin na bagarapim gutpela sevis bilong benk.

BSP i tok ol lida na pipel long ol komyuniti i mas kamap papa bilong benk na wok wantaim ol polis na ol sios na lukautim ol benk long ol rurel brens long kantri.

BSP i tok ol wokman bilong benk na propeti em bikipela samting long olgeta brens long kantri. Na sapos ol pipel i laik kisim sevis orait ol i mas ples lukautim ol sevis bilong benk.

Gren Sif Somare wari long ol Air Niugini pailot lusim wok

GREN Sif Sir Michael Somare, Gavana bilong Is Sepik i bin mekim singaut i go long Minista bilong Stet Enteprais, Ben Micah long dispela wik, long em i mas stretim hevi bilong ol nesenel pailot bilong Air Niugini lusim wok.

Ol nesenel pailot bilong Air Niugini i bin kros long menesen i rausim 20 pesen bilong pe bilong ol na ol i les long wok long dispela wik.

Gren Sif, Sir Michael i bin singaut long Minista na tu Gavman long putim olgeta ripot bilong odit na fainens bilong olgeta stet enteprais long Palamen miting.

“Mi bin mekim tok promis long 2002 ileksen olsem, olgeta profesenal Papua Niugini husat i holim wok long kampani i mas kisim wankain pe olsem ol ekspetriet bilong narapela kantri. Namba wan lain tru husat i mas kisim samting i kam long dispela tok promis em ol pailot na ol i bin wok long kisim wankain pe olsem ol narapela pailot long ol bikipela airlain long wol,” Sir Michael i tok.

“Pastaim CEO bilong Air Niugini na pastaim siaman i save gut tru long disisen mi bin mekim. Mipela i mekim disisen long apim pe bilong ol nesenel pailot wankain olsem ol narapela pailot. Em i bin wanpela hatpela disisen bilong Nesenel Eksekutiv Kaunsil we mipela i bin givim tok orait long en,” em i tok.

Sir Michael i tok, nau Air Niugini i bungim bikipela hevi tru na dis-

pela pasin i bagarapim tru ol namba wan profesenal pipel bilong airlain i mas gat moa stori bihain long dispela na i no toktok bilong katim 20 pesen pe tasol.


Em i tok, Gavman i mas kamaut klia na tok save long ol pipel bilong Papua Niugini long ol kampani bilong gavman olsem Air Niugini Telikom PNG, PNG Pawa na Pos PNG ii stap olsem wanem nau.

Em i tok, Minista i mas tok stret long wanem kain hevi Air Niugini wok long bungim. Em i singaut tu long CEO bilong Stet On Enteprais, Wasantha Kumarasiri long em i mas kam insait hariap na stretim dispela hevi bikos Air Niugini bai lusim moa long ol pailot we Airlain i bin putim bikipela mani long trenim ol pinis.

Em i luk olsem ol hevi nau i stap long taim bilong gavman aninit long Sir Mekere Morauta na taim dispela Minista i bin stap olsem Pablik Enteprais Minista.

“Minista i mas no ken haitim tok tru bilong ol Stet on enteprais na givim baksait. Ating em i laik haitim tingting baksait bilong salim ol dispela kampani bilong gavman ah?”

“Mista Micah, olsem Minista i lukautim ol kampani bilong gavman i mas tok klia long ol pipel bilong Papua Niugini long wanem as na gavman i wok long yusim tumas Falcon Jet na hamas dinaw gavman nau i gat wantaim Air Niugini long 2013 i kam,” Sir Michael i tok.



MEKIM KLIA: SPOTS na lvents Minista, Justin Tkatchenko, i mekim klia olsem hap graun long Koki, klostu long Koki Maket i bilong ol Wanigela pipel. Wanpela kontrakta i bin tok hap graun i bilong em na olsem Minista i mekim klia. Ol bai yusim hap graun olsem spot o pilai graun na baksait long en, ol bai wokim pis maket. *Poto: Nicky Bernard*

Ol skul i no ken sasim projek fit: Kuman

Stanley Nondol i raitim

EDUKESAN Minista Nick Kuman i mekim tok save gen long olgeta skul insait long kantri i no ken sasim projek fi na ol arapela fi bikos gavman i givim inap mani pinis long ranim ol skul.

Minista Kuman i mekim dispela tok klia aste long namba wan sindaun bilong Palamen long 2014. Em i tok gavman i givim moa long K3 bilien insait long 3-pela yia long ol skul na ol skul i mas menesim

mani gut na i mas i gat inap mani long statim skul.

Mista Kuman i mekim dispela toktok taim memba bilong Lae, Loujaya Kouja i askim em long tok klia long projek fi bikos planti toktok i kamap long projek fi namel long ol skul, pablik, gavman na ol papamama.

Mista Kuman i tok gavman i givim inap mani long fri eduksen long las yia na antap long en ol wan wan open memba i sapotim ol skul long DSIP mani long wokim

klasrum, haus bilong ol tisa na ol arapela helpim.

Em i tok ol skul i mas gat inap mani long benk akaun bilong skul long statim skul yia na i no ken kisim projek fi long statim skul.

Minista Kuman wantaim Seketeri bilong Edukesen, Dokta Michael Tapo i tokaut long pablik pinis olsem bai no gat projek fi long dispela yia. Tasol ripot i kamap olsem sampela skul insait long kantri i wok long sasim ol projek fi na i tok ol i sot long mani long statim skul

bikos ol i no save kisim fri eduksen mani hariap.

Mista Kuaman Nesenel Edukesen Bot i mekim dissent long las yia na dipatmen i salim toksave go long olgeta provinsal eduksen bod long olgeta hetmasta, skul bod i mas bihainim disisen bilong NEB na noken sasim projek fi na tu ol narapela fi long papamana.

Mista Kuman i tok eduksen bilong pikini em fri. Gavman i givim inap mani long ol skul pinis na i nogat nid long ol sasim ol fi gen

long papamama.

Longwankain taim Mista Kuman i givim tok lukaut long ol skul bot, het tisa na skul bot olsem eduksen dipatmen bai givim mekim save sapos ol i sasim ol fi long ol papamama.

MISTA Kuman tokim palamen olsem dipatmen i kamapim 4-pela kol senta bilong wanwan rijon long ol pablik i ken kolim na putim komplemen sapos ol i lukim wanpela skul i sasim projek fi na ol arapela fi long papa mama.

Yangpela meri bai skul pailot

Joylyne Karato UPNG sumatin i raitim

NAMEL long ol 12-pela sumatin husat bai lusim PNG tumora long pailot skul long Philippines I gat wanpela yangpela meri husat i gat 18-pela krismas.

Brenda Yangen bilong Wabag i pin- isim gred 12 long Gerehu Sekenderi skul las yia i gat sans long go long dispela pailot trening long kantri Phillip- ines.

Mis Yangen i tok em i gat bikipela amamas long wanem, ol man i save i tok olsem ol meri i no inap long kalap antap long diwai, tasol long dispela wok olsem pailot, eMis Yangen i ting olsem bai kisim save na tingting na i soim strong long mekim wok.

“Taim mi stap long skul,mi save putim bilip bilong mi long kamap pailot tasol taim mi kamap bikipela mi save lus tingting na ting olsem em i hat long painim wanpela pailot skul. Na tu long hevi long sait bilong skul fi.”Mis Yangen i tok.

Em tu i tok tenkyu long Papa na mama long ol i gat gutpela tingting long sapotim em long skul fi bilong em long kamapin tru driman bilong em.

Papa bilong Brenda em Provinsel Polis Komanda bilong Hela provins Mark Daniel Yangen i tok em i amamas stret olsem namba wan pikinini meri bi- long em i kisim sans long go long pailot trening.

Em i tok em i sapos long pinisim wan- pla lo kos long dispela yia, tasol em i tok long lusim long stretim skul fi bilong pikinini bilong em.

Em i stongim pikinini meri bilong em na tok olsem maski ol man i tok baksait olsem em i no inap long mekim, tasol olsem papa em i tok em i nap long kamap gutpela pailot long kantri.

Kepten Bruce Paki i tok em i amamas tu long kisim wanpela meri sumatin we i gat stongpela tingting long daunim ol hevi long laip bilong em na go skul long kamap pailot.

Joylyne Karato UPNG sumatin i raitim

12- pela sumatin bilong Papua Niguini bai lusim kantri tumara na go long wanpela pailot skul.

Long tok gutbai seremoni long las Sande ol i bin sainim wanpela kontrak wantaim in- strukta bilong Aero Equipt Avi- ation (AEA) long ai bilong papa na mama bilong ol.

Dispela kontrak ol i sainim i gat ol gaidlain we ol sumatin bai stap aninit long dispela pailot skul long taim ol stap long skul, na long kamapim rilesensip wantaim ol papa na mama na tu, husat man i spon- sailim ol long dispela skul.

Dispela kontrak bai helpim ol long bihainim gutpela pasin na kamapim gutpela na helti laip stail na positive o gutpela tingting long ranim balus taim

ol i pinisim trening bilong ol.

Instrakta bilong (AEA) Kepten Bruce Paki i tokim ol sumatin long mekim papa na mama bilong ol long amamas, na tu apim nem bilong kantri.Olsem na i mas gat gut- pela pasin na tu tras i mas stap.

Kepten Paki i tok olsem sapos ol i gat tras wantaim gutpela pasin,em bai kamapim bikipela network we ol bai gat luksave long ol bikipela ol aviesen kampani na gol o taget bilong ol bai karem kaikai.

“As tingting na driman bilong yupela i no long kamap kome- sel pailot tasol, long kisim gut- pela mak long ranim balus long ol narapela kantri, statim balus kampani,bilong ol yet long PNG na tu long statim pailot trening skul bilong yumi yet long kantri.”Kepten Paki i tok.

Makim maus bilong Philip-

ins Embaseda long PNG,Biena Ejano Pohani i tokim ol sumatin long rausim tingting bi- long tingim bek ples na papa na mama taim ol i stap long skul na kamap ol bes pailot taim ol kam bek long PNG.

Em tu i tok tenkyu long Kepten Paki long opim dua bi- long ol sumatin long go kisim trening long kamap pailot we em i stat bilong ol PNG sumatin long kisim trening.

“Nau mi lukim olsem dispela kontak tu ol sainim i nupela. Pastaim ol sumatin i no save mekim kain agrimen olsem nau ol mekim wantaim papa na mama.”Mis Pohani i tok.

Kepten Clarke Piokole, Sinia Pailot bilong Air Niguini i strongim ol sumatin na tok ol i mas amamas taim ol i stap long skul. Na I stadi strong long kamapim driman bilong ol.

Embeseada i salensim ol Yunitek sumatin

EMBESEDA bilong Yu- naited Stets ov Amerika (U.S.), Walter North i tokim ol namba wan yia sumatin long Yuniversiti ov Teknoloji (Yunitek) long wok hat long mekim gut long kantri.

Mista North i toktok long ol sumatin, ol wok man na meri, na ol poro long Is Taraka Kempas long Lae, Fonde, Februeri 6. Em i bin lukluk raun long skul wantaim Vais Sensela bi- long Yunitek, Profesa Al- bert Shram.

“Mi salensim yupela long yusim ol samting yu- pela lainim olsem kompas long makim rot we yu ken lukim wok i gohet na helpim mipela long wokim siti antap long maunten. Yu gat pawa long kamapim senis long wol we mipela i laik lukim,” Mista North i tok.

Em i tok moa long toktok bilong Presiden Obama husat i tok Pasifik Senseri taim em i stap lida long U.S. em i laik bildim strongpela historik poro long Pasifik rijon na go het long ol komitmen bilong

em long ol Pasifik Ailan.

Mista North i tok moa olsem PNG na U.S i laik ‘painim amamas’ tasol long kamapim dispela PNG i mas lukluk long ol sitisen i skul na kisim save, na mekim wok.

Em i tokim ol sumatin olsem Presiden John F. Kennedy i tokim ol pipel bi- long Amerika olsem ‘noken askim wanem kantri bilong yu bai wokim long yu, tasol wanem yu ken wokim long kantri bi- long yu’.



Embeseada bilong Yunaited Stets ov Amerika (U.S.), Walter North i toktok wantaim ol sumatin bilong Yunivesti of Teknoloji long taim em go raun na bungim ol.

No gat tok klia long hamas mani PNG kisim long LNG

Stanely Nondol i raitim

OPOSISEN i askim Praim Minista, Peter O’Neill long tok klia long pablik hamas profit PNG i kisim long LNG ges kantri i salim pinis.

Deputi Oposisen lida, Sam Basil i tok kantri i salim moa long 60 kago bilong ges i go aut long wol maket pinis na em i askim Mista O’Neill long tok klia long Palamen hamas winmani i kam bek long kantri na husat tru i bosim ol dispela winmani.

Praim Minista Peter O’Neill i bekim na tok dispela winmani bilong LNG i stap yet ausait long kantri na benk i givim tok orait pinis long ExxonMobil PNG bai kisim mani i kam insait.

Mista Basil i askim dispela bihain long Mista O’Neill i bekim askim bilong Gavana bilong Westen provins Ati Wobiro. Em I bin askim gavman long tok klia long ol sevis bi- long LNG ges long givim pawa saplai long Mosbi siti.

ExxonMobil PNG i bin tokaut las wik olsem PNG i salim 65 kago bilong LNG ges i go aut long wol maket pinis. Taim kantri i salim namba wan ges long mun Me las yia, ripot i tok wan wan sipmen i mekim moa long K120 milien. Long dispela taim, prais bilong oil long wol maket bin stap gut, olsem US\$ 100 long wan wan barel.

Tasol bihain long 4 o 5-pela mun, prais i pundaun kam daun long US\$ 50 dola long wanpela barel.

Na em i tru olsem ExxonMobil PNG na gavman i no tok klia long hamas mani LNG projek i mekim long 65 kago i go aut long wol maket.

Mista Wobiro askim Praim Minista O’Neill long tok klia wanem sevis ol pipel bilong Westen bai kisim long LNG ges bikos gav- man i sainim agrimen long yusim LNG ges long givim pawa saplai long Hela na Pot Mosbi.

Mista O’Neill i tok gavman wantaim

ExxonMobil PNG i sainim agrimen long givim pawa saplai long mak bilong 25 megawat long Mosbi siti long daunim hevi bilong pawa siti i wok long bungim nau.

Toktok bilong pawa i kirapim Oposisen, na deputi lida, Sam Basil i askim Mista O’Neill long tok klia long tupela jenereta we gavman i yusim moa long K100 milien long baim i stap long wanem hap.

Mista O’Neill i tok wanpela bilong dispela jenereta i stap long Kanudi pawa stesen long Mosbi. Ol stretim na i wok long givim saplai long Mosbi. Na narapela em stap long Lae na ol wokman i wok long stretim pas- taim na bai ol i yusim long apim pawa saplai long Lae.

Mista O’Neill i tok klia olsem tupela jenereta gavman i baim em i no seken hen jenereta olsem Oposisen i tok. Em i tokim Mista Basil long go long Kanudi na Lae na lukim long ai bilong em na i no ken toktok nating.



Deputi Oposisen lida, Sam Basil

PNG-NID projek trenim midia na divelopmen patna

Frieda Sila Kana i raitim

NESENEL STATISTIK OPIS (NSO) wantaim Sivel Rejistri Opis long Pot Mosbi las wik Fraide i bin holim wanpela trening bilong ol Midia o nius lain long opis bilong NSO long Pot Mosbi.

Trening ya em i bilong lainim ol long wanem samting bai kamap nau wantaim nupela PNG Nesenel Aidentiti na Ilektronik ID Projek.

Em i gutpela sistem bilong bring helpim long ol pipel olsem na wokabaut bilong ol tim bai olgeta taim i stap long nius midia long ol komyuniti bai save.

I bin gat ol nius man na meri na tu ol divelopmen patna olsem UNICEF na Wol Visen na ol narapela i bin stap long dispela trening.

Man i go pas long dispela projek olsem projek menesa bilong Nesenel Aidentiti Projek, Kora Nou i bin givim tok welkam na tok save long tripela bikipela lain husat i stap baksait long NID projek, em Nesenel Statistisen na Projek Dairekta, Roko Koloma, PNG NID-PNG Sivel na Aidentiti

Rejistra, Dickson Diragi na Projek Menesa bilong Huawei Technology (PNG) *Input*-Huawei (PNG), Raymond Anthony.

Bihain dispela tok save trening em ol nius lain na ol projek patna i bin gat sans long lukim ol mobail kit bilong NID rejistra i wok ausait tasol long NSO opis. Ol lain husat i pulimapim ol nem pepa i bin go stret na wokim rejista bilong ol.

“Insait long Hed ov Ejensi Semina long Febuari 5, Prait Minista Peter O'Neill i tokaut long bikipela wok bilong Nesenel Aidentiti (NID) projek long go het.

Long ol 40 yia i go pinis ol gavman bilong yumi i no bin inap long givim trupela namba bilong ol pipel i stap long wan wan wod, LLG na kantri. Olsem gavman i no gat wanpela samting long soim.

Nau dispela gavman i kamap wantaim PNG-NID long mekim isi long luksave long husat i sitisen bilong dispela kantri na tu sapos yu em husat tru na yu kam long we stret,” Mista Koloma i tok.

Dispela program em bai bringim gutpela servis long divelopmen i go long ol pipel bikos ol lain bilong mekim plening bilong

mani bilong divelopmen bai i save hamas mani ol bai putim i go long wanwan ilektoret na LLG, bihainim namba bilong ol pipel bilong ol.

Em i wanpela gutpela samting tru long helpim ol pipel long rurel ples i stap longwe long taun.

Olsem na tok i go long olgeta pipel olsem yu mas rejista long yu ken i gat wanpela Bon dei setifiket long yu ken kisim Ilektronik ID bilong yu long kisim ol servis nau i stap.

Olgeta lain husat i kamap 18 krismas na i go antap bai kisim wanpela ilektronik aidentifikesen kat we ol i ken yusim long olgeta hap ol i go. Em bai mekim isi long opim akaun long benk, bai yu no moa nidim pas i kam long lidaman bilong komyuniti o pris o pastor o wanpela lo man.

Em bai helpim long kisim draiva laisens, paspot bilong go ovasis, kisim helpim long haus sik, skul na planti moa gutpela samting bai yu kisim taim yu gat EID bilong yu.

Narapela bikipela samting em yu ken go long ileksen long makim man yu laikim long em bai makim yu long haus palamen.

I no gat moa pasin paol bai kamap we narapela man bai kisim ples bilong yu long vot. Em bai mekim isi tru long iletoel komisen long save long hamas pipel i winim 18 krismas long wanpela wod o LLG long ol bai i ken kisim gut namba bilong vot na long kaunim tu.

“Dispela projek bai mekim luksave long ol ples lain long kisim ol wankain servis olsem long ol taun na siti.” Mista Koloma i tok.

NID Projek bai stat long wok bihain long tupela wik. Namba wan ples bilong stat na traim dispela projek bai kamap insait long lalibu/Pangia long ilektorret bilong Prait Minista Peter O'Neill.

Bihain bai em i go moa long narapela ol hap bilong Sauten Hailans wantaim 50 tim long go aut. Narapela ol provins bai stat wantaim em long Milen Bei, Sentral, Niu Ailan na Manus provins.

Bai i gat 400 fil opisa i go aut long olgeta hap bilong kantri long ol bus, ailan, na ol taun long rejista long olgeta lain na givim aut bon de setifiket. Ol namba bilong tim bai i go antap long 600 olgeta long mekim wok i go yet.

Nesenel Plening, Monitarin na Implementesen Dipatmen i sainim pinis ol MOU wantaim Ile-

torel Komisen na ol Sios long mekim dispela projek. Midia na ol niuslain i gat bikipela wok long mekim na dispela projek bilong Nesenel Aidentiti rolaut bai kamap gut.

I gat bikipela nid long pablisiti olsem ol pipel long rurel eria na long taun tu i mas klia gut long dispela projek na wanbel long kam insait na rejista.

Olsem na bai i gat ol toksave olgeta taim long midia na nius long soim wanem mak nau dispela projek i stap long en.

“Sefti bilong ol Mobail Tim na ol ikwipmen em i stap long han bilong ol lida bilong ples na ol pipel. Ol bai no gat ol sekyuriti pesonel i go wantaim ol bikos bai bikipela mani tumas long kisim ol wantaim.” Project Menesa bilong NID, Kora Nou i tok.

Olgeta yia long mun Jun Nesenel Statistik Opis i save givim ripot long Nesenel Palamen long namba bilong ol pipel.

Ol lida i mas helpim ol pipel bilong ol long go na rejista. Olgeta wan wan tim bai i gat namba long opis bilong NSO bai bihainim ol long wanem hap ples ol i stap long en, long taim ol i go long statim program bilong rejista.

Skul stat taim givim hevi long Modilon trefik

James G. Kilai raitim

I GAT wanpela bikipela rot tasol i go insait long Madang taun ol i kolim Modilon Rot.

Stat long dispela wik Mande taim ol skul sumatin i go bek long skul bikipela hevi tru i kamap long ron bilong trefik long ol kar i go insait long Madang taun.

Longpela lain kar i ron isi isi tru stat long Modilon Hausik i go olgeta long Handy Mart maunten bikos long pedestrien krosing tu i stap long Modilon Hausik.

Dispela hevi bilong pedestrien krosing i stap long hapsait bilong rot na ol sumatin i save kalapim rot long go long skul. Ol

sumatin bilong Luteran De praimer skul na tu Luteran Skul ov Nasing, UPNG open kempus na tu Koles ov Distens Education (CODE). Ol wokman meri bilong Modilon Hausik tu i save yusim krosing na tu ol lain bilong kisim marasin na dispela i save stopim ron bilong kar na lain i save go longpela tru

Madang i save bungim hevi blong trefik olgeta moning stat long 7-kilok i go olsem 9-kilok stat long Mande i go Fraide.

Pablik long Madang i wok long toktok planti olsem Madang provinsal gavman na ol lida long provins i mas tingting nau long putim mani long wokim narapela rot i go



Longpela lain kar long Modilon rot long moning bikos ol sumatin yusim pedestrien krosing. Poto: James G. Kila

olsem long taun o mekim Modilon rot i go bikipela.

Rot pastaim sampela mauswara lida bilong Madang provins i toktok long en em bai ron long DCA o Madang ples-

balus i l go olsem long Kerema Kompaun na Diwain Wod Yunivesiti i go bungim Nabasa rot. Dispela toktok i kamap bipo tasol i go wara nating bikos nogat mani na tu

nogat gutpela lida long Madang i long strongim tok long rot i ken kamap.

Narapela skul krosing tu i stap long Holi Spirit klostu long Modilon soping senta na

dispela tu i save kisim hat taim long ol kar bikos ol bai stop na wetim ol sumatin i wokabaut i go hapsait long rot na go long skul.

NCD Kontrakta pasim geit bilong FINCORP

LONG Trinde aste, ol NCD kontrakta i bin go long Edukesen opis long FINCORP haus long Waigani na pasim get.

Ol kontrakta husat i wok long singaut long pe bilong ol long wokim ol skul infrastraksa haus. Ol i pasim bikipela geit long 2 klok apinun na singaut long Seketeri bilong Edukesen, Michael Tapo long kam lukim ol na tok save long wanem samting i holim bek ol pei bilong ol.

Ol i bin wok long stap ausait long opis klostu wanpela mun olsem na ol i singaut long Mista Tapo long kam na lukim ol stret na tok save long ol. Tasol ol dispela kontrakta i bin go nabaut taim ol polis i bin kamap wantaim Seketeri long em i laik wokim sampela

narapela wok bilong em. Planti ol wokman meri long opis i bin lusim opis na i go pinis.

Ol NCD kontrakta i bin tok ol i wet inap tupela yia nau na ol i no kisim pei bilong wok bilong ol yet. Sampela lain i bin yusim ol samting na mani bilong ol yet long wokim ol dispela klasrum. Na sampela i tok ol meri na pikinini i ranawe na lusim ol bikos long dispela.

Ol tu i painim hat long baim skul samting bilong ol pikinini bilong ol nau bikos long ol i no gat mani. Ol i no inap long baim ol narapela servis bilong ol tu long ol narapela lain i givim servis long ol.

Ol i tok olsem ol i laikim Prait Minista na NEC mas lukluk long dispela hevi na stretim hariap.



Ol kontrakta pasim geitna sanap ausait. Ol i tokim wantok nius olsem ating neks wik bai ol i kam boltim ol geit.

Lukautim gut ol meri long dispela Valentine wik

Taim yumi selebretim Valentine de long dispela wik, ating em i gutpela moa long yumi toktok long ol lewa bilong ol meri bilong yumi. Lewa bilong ol meri i stap helti o no gat?

Yu bai kirap no gut long harim olsem Kardiovaskula disis (CVD) – o hat atek na hap i dai – em i wanpela bikipela sik i save kilim ol meri long olgeta hap bilong wol. Em i winim namba bilong ol meri i save dai long sik kensa, tubekulosis, HIV/AIDS, na malaria bungim wantaim.

"Planti meri tru na ol dokta bilong ol i no save olsem sik long lewa em i namba wan sik i save kilim ol meri. Sik bilong lewa long ol meri i no save kamap long wankain wei olsem ol man.

Ol dispela tok tru i sut long tupela giaman tingting long ol meri na ol dokta bilong ol, na sampela taim i kamapim bagarap: 1. Ol meri i no save kisim sik bilong lewa, na, 2. Taim ol i kisim sik bilong lewa, em i save wok wankain olsem sik long lewa taim ol man i save kisim .

"Trupela tok em i no olsem. Sik bilong lewa em i bikipela long ol meri, tasol, taim ol meri i kisim sik long lewa em i save wok narakain liklik long hao em i save kisim ol man".

Na bikos long dispela giaman tingting, planti dai i save kamap long ol meri long CVD we yumi inap long pasim. Trupela namba bilong ol dai we yumi inap long pasim bai hat long yumi painim, bikos dispela bai gat ol sik olsem ol meri i komplem long bros i pen na ol ER i salim ol i go bek long ples wantaim ol mak bilong sik ol i ting i narapela sik, we i no bikipela, kain olsem hat ben o pen long as bilong bel.

Tasol samting mipela i save em sik bilong lewa o hap i dai i save kamapim 8.6 milien dai long ol meri olgeta yia. Em i wanpela hap bilong tripela long olgeta meri i dai long wol. Dispela namba i winim namba bilong populesen bilong dispela kantri. Olsem na:

3.4 milien meri dai wantaim sik we blut i no ron gut long lewa

3 milien meri dai long taim ol i hap

i dai

Narapela 2.2 milien meri save dai long sik bilong lewa i no wok gut, presa long blut na lewa i no wok gut, na sik lewa i solap,

Ol meri husat i stap long ol kantri we i no gat gutpela developmen na gutpela sevis - na ol

i kisim CVD bai i dai yet tasol ol meri kisim wankain sik na ol i stap long wanpela kantri

we i gat olgeta sevis na i gat mani em bai ol i no inap dai.

Em i no sik bilong ol man tasol

Ol meri husat i stap long ol kantri we i no gat gutpela developmen na mani i save kisim moa bagarap na i save dai, winim ol man.

Namba bilong ol meri husat i gat daibitis i save dai long CVD i winim namba bilong ol man husat i gat wankain sik.

Planti taim yangpela meri husat i kisim hat atek bai i ken dai tasol man husat i gat wankain krismas na i kisim hat atek bai i no inap dai.

Ol meri bai kisim moa bagarap taim ol i kisim hat atek

Bihain tasol long hat atek, ol meri bai kisim taim nogut moa long ol man

Ol hevi ken kamap

Ol hevi bai kamap long sik bilong lewa na hat atek long meri na man em i wankain. Tasol, Dokta Sharma long PIH i tok moa olsem, "Hevi long ol meri i painim wantaim sik long lewa bikos long ol rop bilong blut em i liklik na bilong ol man em i bikipela".

Ol samting olsem krismas na stori bilong famili i gutpela long save long en, tasol i gat luksave olsem, planti dai kamap long CVD em i kamap long ol pasin no gut olsem smuk, planti gris long bodi, kaikai i no gut, blut presa i go antap, bodi pat tumas, o i gat daibitis.

Wanpela meri husat i pat tumas, maski em i save wokabaut gut, em i givim moa hevi long bodi i ken kisim sik long lewa 2.48 taim, winim meri i no gat bikipela hevi long bodi.

Ol meri husat i no save mekim bikipela wok o mekim strongpela wok aninit long wanpela aua tasol

long wan wan wik i gat 1.48 taim long kamapim sik bilong lewa, moa long ol meri i save mekim strongpela wok winim 3 aua long wanpela wik.

Ol meri husat i save smuk bai inap kisim hat atek hariap. Ol i smukim moa sigaret em i putim ol long moa hevi

Sapos yu stap klostu tumas long narapela lain i smuk em bai yu ken kisim sik long lewa na dai na 15 pesen bilong ol lain i dai long seken hen smuk em ol meri.

Ol meri wantaim hai blut presa i gat 3.5 taim moa long ol rop bilong blut i go long lewa bai blok (CHD) winim ol meri husat blut presa bilong ol i orait.

Dokta Sharma bilong PIH i tok olsem "Nau em i no moa sik bilong ol lapun meri bikos laip stail i senis, smuk, hevi bilong wok wantaim ol narapela hevi long laip i save kamapim dispela sik."

Ol mak

Taim hat atek i kamap, em i no wankain long ol meri na ol man.

I no olgeta taim ol meri bai kisim wankain sain bilong hat atek olsem ol man, kain olsem strongpela pen long bros we i save ron i go daun bihainim lephan. Ol dispela mak bilong hat atek i ken kamap long ol meri, tasol planti i save pilim pen "isi" tasol na ol inap long paol.

Dispela sikipela mak bilong hat atek i bikipela long ol meri:

Bros pen na i no pilim gut. "Pen long bros em i wanpela klia sain bilong hat atek, tasol sampela meri bai pilim narapela kain long ol man i save pilim. Sampela taim bai ol i pilim olsem bel i tait, na pen bai kamap long narapela hap long bros i no long sait tasol. Bai pilim "no gut tru" long taim hat atek i kam," dokta bilong lewa," Rita Redberg, MD, dairekta bilong Wimen's Cardiovascular Sevis long Yunivesiti bilong California, San Francisco i tok.

Pen long han bilong yu, baksait, nek, o wisket. Dispela kain pen i save kamap long ol meri moa long ol man. Ol meri inap long paol bikos

ol bai ting olsem pen bai i stap long lephan na i no long baksait o long wisket bilong ol. Pen i ken stat isi tru na bihain bai go bikipela o no gat em bai kam strong tru na bihain em i go daun isi, isi pastaim long em bai kam strong olgeta. Sapos yu slip, dispela pen i ken kirapim yu. Olgeta taim yu pilim wanpela kain pen long bodi bilong yu we em i no wankain olsem narapela taim i kamap, em yu mas toksave long dokta bilong yu hariap o go long wanpela helt senta, klinik o haus sik. "Ol mak o pen i kamap long wanpela hap bilong bodi bilong yu i stap antap long namel bilong bodi bilong yu, em yu mas lukim dokta o helt woklain long haus sik hariap," dokta bilong lewa, Cardiologist C. Noel Bairey Merz, MD, dairekta bilong B a r b r a Streisand Women's Heart Center long Cedars-Sinai Medical Senta long Los Angeles i tok.

Bel pen. "Sampela taim ol pipel bai paol long pen bilong hat atek na ol i ting em i bel pen nating, o bros pen, strongpela kus, o sua long bel. Narapela taim, ol meri i save pilim strongpela pen long as bilong bel na pilim olsem wanpela bikipela elepen i sindaun antap long bel bilong em," cardiologist Nieca Goldberg, MD, medikal dairekta bilong Joan H. Tisch Senta bilong Wimen's Helt long NYU Langone Medikal Senta long Niu York i tok.

Sotwin, bel tanim tanim, o ai raun liklik. Sapos yu pilim sotwin nating, em i ken kamap long taim yu laik kisim hat atek, em sapos yu pilim ol narapela kain pen tu. "Yu ken pilim olsem yu bin ron strong longpela rot stret, tasol yu no bin ran liklik," Goldberg i tok.

Tuhat o swet, swet o tuhat nating hariap em i save kamap bikipela long ol meri husat i laik kisim hat atek. Em bai kamap olsem taim yu pilim tait long wok nay u swet i no olsem yu swet long taim yu pilai spot o stap ausait long san. "Yu mas go sekap" sapos yu no lukim swet o tuhat olsem, i no gat narapela as bilong dispela, olsem pilim hot nating,

Bairey Merz i tok.

Strongpela Sik long Lewa

Strongpela sik long lewa na skin hot i save kamap planti long PNG na em i save kamapim vavular sik long hat wantaim ol yangpela pipel. Sapos wanpela sik bilong pikinini o bikipela lain i kamap na ol i no kisim marasin em i ken go na kamapim sik long arere bilong lewa na mekim hat i no wok gut na pamim blut na win i go long kru na bodi. Dispela bai mekim hat bai stop na man i ken dai tu. Ol yangpela meri planti taim i no save mekim eksesais o strongpela wok, ol i save pilim skin les na lek i solap tasol ol i no save olsem as bilong dispela em bikos i gat hevi long hat o lewa bilong ol.

Sik long lewa em i bikipela long Papua New Guinea bikos long ol kain hevi olsem Daibitis o tumas suga long blut, Haipetensen o blut presa i go antap, bodi pat tumas na kaikai planti gris kaikai na i no save mekim eksesais o strongpela wok.

Em i gutpela long ol meri i mas save long wanem kain hevi ol i ken bungim na wanem kain sain bilong sik long lewa. Gutnius em i olsem taim PNG i kisim namba wan level 3 Hat senta long Febuari 2015 long nupela PIH, i gat planti masin bilong sekap na kisim marasin o helpim i kam pinis winim taim bipo. Dispela hat senta i stap long helpim olgeta lain long sekap hariap na kisim marasin long stopim bikipela sik na dai.

I gat wanpela hat sejeri tim bai stap sambai olgeta taim na ol i ken yusim dispela hat operesen tieta long wokim hat wok eni taim insait long wanpela yia.

Dispela cath-lab nau i stap pinis na ol i ken wokim liklik wok bilong stretim ol rop bilong blut i blok na long stretim ol pam bilong hat na stretim. Yu ken askim long dispela taim yu salim teks i kam long 7155-8866 o salim email pihopd@gmail.com. Mipela i stap long Facebook long website www.pih.com.pg

- Antenatal package
- Labour & delivery package
- Laparoscopic 'keyhole' surgery
- Well woman and baby clinic
- Neonatal intensive care

Get ready to deliver your next baby at the luxurious labor & delivery suite at the new PIH !



PNG painim rot bilong daunim sik malaria

MOSES Laman, wanpela risets dokta bilong Papua Niugini i pinisim wanpela wok painim aut long marasin bilong kilim binatang bilong malaria pinis. Em i bin mekim skul bilong em long PhD long Yunivesiti bilong Westen Australia, aninit long Australia Awod skolasip.

Dokta Laman i traim pinis dispela nupela marasin we i winim ol sampela olupela marasin bilong malaria we ol binatang i save long ol pinis na i save abrusim.

Dokta Laman, i go pas long raitim wanpela stadi we ol i bin pablisim insait long biknem jenol *PLoS Medicine*. Stadi i bin givim ol bikipela tingting long traim wanpela nupela marasin bilong malaria.

Binatang bilong malaria i bin kamapim banis long em yet na klorakwin marasin i no moa save kilim i dai, inap planti yia nau. Ol man i wok long resis long painim ol nupela wei bilong kilim dispela sik malaria. Ol kain kain marasin i bung na yusim nem artemisinin em ol i kisim long wanpela diwai, wantaim ol narapela marasin i save wok longpela taim long kilim sik olsem piper-aquine o lumefantrine, i luk olsem ol bung wantaim i ken wok tasol i no olgeta taim tru.

Dokta Laman i tok long PNG na long planti


narapela kantri, i gat kain kain malaria i stap, olsem na em i givim moa hetpen long painim rait marasin o wei bilong tritim malaria. Wanpela hap binatang nogut tru inap kilim man em falciparum na narapela we em i no strongpela tumas em vivax. Tupela wantaim i save birua long ol pikinini.

Dokta Laman wantaim supevaisa bilong em, Profesa Tim Davis na ol wanwok bilong em, i pasim tingting long traim strong bilong nupela marasin ol i kolim, artemether-lumefantrine, abrusim narapela olupela marasin artemisinin-naphthoquine.

Ol i makim 250 pikinini long krismas bilong ol namel long 6 mun i go long 5 yia husat i gat fiva o skin hat ol i kisim long ol sik malaria tasol i no sik bikipela tumas.

Hap namba bilong ol pikinini em ol i givim ol artemisinin-naphthoquine, tasol ol lain bilong risets i no bihainim toktok bilong lain i wokim marasin long givim olgeta long wanpela de tasol. Ol i senisim na givim marasin yia isi, isi insait long tripela de bihainim tok stia bilong Wol Helt Ogenaisesen (WHO) na ol i was gut long lukim senis long helt bilong ol pikinini na sikspera mun bihain ol i sekim ol gen.

Ol i painimaut olsem artemisinin-naphthoquine em i seif long kisim insait long 3-pela



Dokta Moses Laman wantaim atometik masin bilong sekim blut long lukim malaria binatang.

de na tu em i winim wok bilong narapela marasin, artemether-lumefantrine long daunim vivax malaria.

Olgeta pikinini i kisim artemisinin-naphthoquine i kamap fri olgeta bihain long ol i kisim dispela marasin. Ol dokta i painimaut tu olsem artemether-lumefantrine em i gutpela

long daunim strongpela binatang falciparum malaria we i save kilim man.

Dokta Laman i kisim helpim long Australia Awards skolasip na wok bilong traim ol marasin em i wokim wantaim mani i kam long NHMRC projek gren.

Helt woka laikim moa Raikos pikinini long kisim CHW trening

JAMES G. KILA i raitim

OL Papa mama bilong ol sumatin bilong Raikos distrik husat i pinisim gret 12 las yia na yia bipo i mas tingting long putim pikinini bilong ol long Komyuniti Helt Woka (CHW) trening long helpim helt sevis insait long distrik.

Nesing Opisa wantaim Ramu NiCo Menesmen (MCC), Paul Konare i mekim dispela toktok na givim salens bihain long em i luksave olsem Raikos i gat bikipela nid tru i stap long ol komyuniti helt woka (CHW)long distrik.

Las wik i go pinis Mista Konare i bringim foapela sumatin bilong Raikos i go long Gaubin CHW trening senta bilong Evangelikol Lutheran Sios long Karkar Ailan. Tasol em i tok moa sumatin bilong Raikos husat i pinisim gret 12 i mas givim bel na tingting nau long helpim helt sevis long distrik bilong ol. Dispela em bikos helt sevis i pundaun stret long distrik bikos nogat ol CHW i wok long ol ol eid pos insait long distrik

Mista Konare i tok olsem nau yet 8-pela eid pos long Raikos distrik long Yaganon wod i no gat ol komyuniti helt woka (CHW) bikos ol olupela lain eid pos odeli (APO)em

gavman i kisim ol long wok long 1970s na 1980s i lapun pinis na nogat lain i senisim ples bilong ol, na ol eid pos i stap nating.

Dispela nesing opisa wantaim Ramu NiCo i save mekim planti gutpela wok long sevim ol manmeri na pikinini long Basamuk eria long taim bilong hevi bilong sik.

Em i sevim planti ol mama i bungim hevi long karim pikinini na tu i save go aut long givim marasin na helpim long ol ples arere long Basamuk eria na wok bilong em i smat tru.

Mista Konare i bin wok pastaim long Ganglau klinik klostu long Basamuk na i hatwok long kamapim wok-bung wantaim Gaubin CHW trening skul long kisim ol sumatin bilong Basamuk eria long go skul long hap.

Em i redim rot tu long Ganglau klinik long givim sampela kain helpim olsem nupela ples-slip i go long Gaubin CHW skul we ol sumatin bilong Raikos bai i go stap long en.

Em i tok ol wok redi i go het bringim ol samting long wokim nupela domitori long Gaubin yusim ol samting we Ganglau klinik i bin kisim olsem donesen i kam long Ramu NiCo Menesmen (MCC) long Basamuk.



Nesing opisa Paul Konare givim ol buk long helt aweanes long Basamuk eria long Madang.

Ol meri Ramu projek kisim trak long ADB



Trak bilong ol meri long KBK eria long Ramu nikel projek i wokim wok bilong ol mama.

James G. Kila i raitim

OL MERI insait long Ramu NiCo Projek eria long Usino-Bundi na Raikos distrik long Madang provins i amamas tru nau long ran long PMV trak bilong ol yet long wokim ol egro-bisnis.

Ol meri i amamas long Krismas na Nu Yia taim, long ran long kar bilong ol yet i go kam long Madang taun long salim kaikai na baim samting.

Wanpela dairekta bilong Kurumbukari Lenona Kampani (Lanco), Bonny Yombai i givim tok amamas long Gavman na Mineral Risos Atoriti (MRA) long luksave long nid bilong ol meri long ol maining na petroleum projek komyuniti long bringim kain gutpela helpim olsem long rurel eria.

Mista Yombai i amamas olsem dispela trak ol lain meri bilong Kurumbukari Wimen grup i kisim i helpim ol rurel mama long ples long go salim kaikai long taun na tu helpim ol long ol arapela wok. Long bipo i no gat kain helpim o sevis olsem i save go long ol mama long Kurumbukari, tasol taim Ramu NiCo Projek i kam, em i bringim kain luksave i go long ol liklik lain olsem ol mama long ples.

Dispela helpim bilong gavman aninit long MRA i kam aninit long Nesenel Gavman Asistens Skim ol i kolim Smol Gren Projek.

Foapela mama grup insait long Ramu Projek eria long las yia i bin kisim helpim long Wol Benk program, Wol Benk Maining Sekta Institusenel Strentening Teknikol Asistens Projek 2.

Ol mama insait long Ramu Projek eria i bin givim 4-pela aplikesen na olgeta 4-pela wantaim bai kisim helpim. Bilong wanem ol i bin kisim helpim bilong Ramu NiCo (MCC) Jenda opisa, Agatha Yombai na tupela lain i stretim ol pepa wok em agrikalsa sastenabiliti opisa Allan Wahwah na Bisnis Dvelopmen Opisa,

Brodney Seip.

Planti ol mama bilong KBK na Maigari i amamas tru bikos dispela em i namba wan taim tru bilong wanpela bikipela ogenaiesin olsem Wol Benk i luksave na helpim ol mama long eria bilong ol.

Deputi Siaman bilong KBK Lenona Asosesin (LOA), Diri Movikai i tok Kurumbukari na sampela ples long Usino eria i bin stap long bikipela bus na no gat developmen long en stret, inap Ramu NiCo (MCC) i bin kam na kamapim developmen. Taim MCC i kam, kain kain helpim i go insait long Usino-Bundi eria na dispela em wanpela long ol kain nupela developmen o helpim i go long ol wimen grup.



Yut, Meri na Famili
Pastor Barbara Lunge

Yumi olgeta i pikinini man bilong God.

YUPELA i kamap pikinini man bilong God taim yupela i bilip long Kraiss Jisas na yumi gat nem long kisim olgeta samting God i gat.

Planti bilong yupela i kisim baptais pinis insait long Kraiss na yupela i putim Kraiss olsem klos bilong yupela. Nau i no gat ol Juda o Grik, i no gat man i stap wokman nating o i stap fri, i no gat man na meri, bilong yupela olgeta i stap wan insait long Kraiss Jisas.

Na sapos yupela i bilong Kraiss, yupela i kamap sit bilong Abraham, na yupela i gat rait long kisim olgeta samting i kam long God, olsem tok promis bilong en i tok. (Galesia 3:26-28)

Nau bikos yupela i stap pikinini man bilong God, em i salim Spirit bilong Pikinini Man bilong em i kam insait long lewa bilong yupela na yupela i krai Aba, Papa! Olsem na yupela i no moa stap olsem wokboi nating tasol pikinini man bilong en, na yupela i gat olgeta samting God i gat insait long laip bilong yupela wantaim Kraiss. Galesia 4:6-7

Long graun em yumi gat man na meri tasol long heven na long ai bilong God em yumi olgeta i pikinini man tasol. Sapos yu wanpela meri nau yu ting olsem yu no inap long mekim samting long helpim yu yet em yu mas senisim tingting bilong yu nau. Kirap long wanem hap yu stap aninit long hevi bilong ol man i lukdaun long yu o rabisim yu na holim pas long tok promis bilong God em i givim long yu. Dispela kain tok olsem mi autim long antap.

Kolim nem bilong Jisas na brukim strong bilong satan i wok long daunim yu na givim tingting no gut long yu olsem yu no inap long kamap fri. Yu no moa stap wokmeri nating bilong satan o wanpela man bilong graun.

Mi bin stap wankain olsem yu taim man i bin lusim mi. Tasol nau taim mi pas wantaim Jisas Kraiss na luksave long rait bilong mi olsem wanpela pikinini man i save gat rait long kisim ol samting bilong papa bilong en, mi kamap fri.

Toksave: Sapos yu wanpela mama i gat wari, tingting planti, o bel hevi yu ken raitim pas long dispela adres na pon namba. Barbara Lunge, ROGIM, P.O. Box 3063. Boroko. NCD. PNG, o ring long 70995378 o salim email long: lungeb37@gmail.com

The Voice Inc. na Oaktree Faundesen Senisim Yut



TUPELA yangpela sumatin bilong Yunivesiti bilong Papua Niugini (UPNG) husat i save go pas long ol lidasip wok bilong The Voice Inc. PNG i bin go long wanpela miting bilong ol wantaim Oaktree Foundation Australia long senisim save bilong ol yut namel long tupela ogenaiesen bilong ol yangpela long taim bilong Nesenel Konpens bilong ol long Melbourne Australia.

Tupela sumatin Sebangas Siming na Jerome Sesega i bin go wantaim wanpela wok man bilong The Voice Inc. long las wik. Oaktree Faundesen i holim Nesenel Konpens bilong ol long 5 Februari. Tripela lain bai bung wantaim ol yut i kam long olgeta hap bilong Australia na i bung long Melbourne.

“Olgeta volantia bilong Oaktree i kam long olgeta hap bilong kantri bai bung long Victoria long lainim samting long wanpela narapela na harim ol lain i gat moa save long wan wan wok i ken toktok long wanem kain save ol i gat. Em bai senisim tingting bilong ol yangpela tru,” Maddi Ginnivan – Dairekta bilong Yut Eksens Oaktree i tok.

Sebangaz Siming na Jerome Sesega nau i save wok wantaim The Voice Inc's Lidasip Dvelopmen Program long UPNG. Tupela bai ranim sampela sesen long tok-tok bilong lidasip na tu long sosol laip bilong yangpela man na meri long PNG na wanem kain ol hevi ol i save bungim.

Sebangaz Siming i gat 20 krismas na em wokim las yia sumatin long skul bilong Benk na Fainens long UPNG na em i save wok strong long ol program bilong The Voice Inc. Em i Kodineta bilong Senta bilong Lidasip long Yunivesiti bilong Papua Niugini. Em i laik long lainim ol strateji bilong kempain long ol wanlain bilong Australia taim em i go long Oaktree Nesenel Konpens long Victoria.

Wewak Daiosis i gat nupela bisop

OL Katolik pipel long Wewak Daiosis long Is Sepik Provins i amamas long kisim nius olsem Pater Jozef Roszynski bai kamap nupela bisop na hetman long daiosis bilong ol.

Hetman bilong Katolik Sios long wol, Pop Francis I makim Pater Jozef olsem nupela bisop bilong Wewak Daiosis long kisim ples bilong pastaim bisop bilong Wewak Daiosis husat i bin dai tupela yia i go pinis long yia 2013.

Bisop Jozef i wanpela Divain Wod Misinari (SVD) pater na em i bilong kantri Polan long Yurop.

Mama i karim em long Ogas 18, 1962 long ples Nidzica long daiosis bilong Warmia, Polan.

Taim em i autim dispela nius long ol Katolik pipel long PNG, mausman bilong Pop long PNG na Solomon Ailan i beis long Mosbi em Nunsio Asbisop Michael W Banach i tok Pop Francis i makim Pater Jozef olsem bisop bilong Wewak Daiosis long las Fraide belotaim long Vatiken, Rom.

Nunsio Michael i tok em i ama-



Pop i makim Jozef Roszynsk long kamap nupela bisop bilong Wewak Daiosis. **Poto: SVD kongriksen**

mas long nius na em i welkamim nupela bisop long joinim ol Katolik bisop na em bai wok wantaim ol bisop long Konprens bilong PNG na Solomon Ailan.

“Yumi helpim em long pre na Bikman I ken strongim em long mekim gut wok na lukautim sios bilong em, na sevim em gut,” NUnso Asbisop Michael i tok.

Bisop Jozef i bin pinisim skul

pater long meja semineri bilong ol SVD long Pieniezno na I bin kamap pater long mun Epril 1989.

Long 1991, ol I bin salim em I kam mekim wok misineri long Wewak Daiosis.

Bihain em I kamap pater, em i bin wok long sampela pastorel na akademik wok olsem go pas long peris ministry long Pieniezno, Polan long 1989-1991, skulim tok Inglis long Ireland long 1991-92, misineri long Wewak Daiosis long 1992-2014, Vais pasto long Kunjingini long 1992-93, stadi long DWU- Melanesien Kalsa na Diploma long Humen Risos Menesmen long 1993-94, Pasto long Warabung long 1994-2000, Kaunseling kos long DWU long 1996-97, Pasto long Wirui long 1997-2000Memeba bilong SVD Provinsel Kaunsel long PNG, Pasto long Wewak distrik long 2002-2014, Supiria bilong ol SVD long

Wewak long 2005-2008, temporeri Provinsel supiria bilong ol SVD long PNG 2009-2010, memba bilong ol Komisin long Apostolik Edminstretra long menesmen bilong fainens na pastorel kea long Wewak Daiosis taim pastaim bisop I dai.

Long mun Mas 2014, bosman bilong ol SVD kongriksen long wol, Pater Heinz Kuluke i bin makim em Misin Seketeri bilong PNG SVD Provins.

Nau em i stap long Wirui na em i wok olsem Distrik Supiria long ol SVD lain i wok long hap.

Em i helpim wantaim pastorel wok long ol peris long Wewak Daiosis i gat ol pater long en.

Ol pipel long Wewak Daiosis i amamas long pater Jozef husat i wok longpela taim long hap na wok gut wantaim ol.

Em i bin wok aninit long tripela bisop long Wewak Daiosis.

Em long Bisop Leo Arkfeld, Bisop Raymong Kaliz na Bisop Anthony Crapp.

Lotu bilong tupela man Hanuabada i dai

Sape Metta i raitim

HEVI bilong buai ben o tambu i kamapim pinis 12-pela dai long Mosbi.

Tupela i bilong bikples Hanuabada, klostu long Mosbi siti em leit Nicholas Goru Rarua husat i gat 37 krismas na Toka Gaudi Toka husat i gat 33 krismas .

Dispela tupela man i bin dai bihain long polis i bin go insait long ples na pait wantaim ol asples man na meri long buai maket long Hanuabada yet.

Toktok long dai bilong tupela man ya i no kamap klia tumas na polis wantaim ol lidaman na meri long ples i wanbel long wokbung na mekim wok painim aut long husat tru i kamapim dispela birua long tupela man.

Papa bilong leit Toka, Gaudi Toka i tok hevi i kamap pinis we pikinini bilong emi lusim laip bilong em na em i pilim bikpela bel pen tru long dispela.

Tasol olsem wanpela strongpela bilipman long sait bilong

lotu, em i tok “maski sapos husat tru i pulim katres na kamapim dai long pikinini bilong mi, mi lusim rong bilong dispela ol man”, Mista Toka i tok

Bodi bilong tupela man em ol famili, wantok na wanpinis i bin rausim long Funerel Hom na karim i go bek long ples long Sande wik i go pinis. Na ol i holim pablik memoriel lotu long Lahara Yunaitet Sios.

Bihain ol bodi i ovanait na long Mande dispela wik, ol i bringim i go na planim long ples matmat long Badihagwa.

Sif Seketeri bilong gavman, Sir Manasupe Zurenuoc i bin tok strong olsem opis bilong em bai givim ful sapot i go long mekim wok painim aut na bringim husat tru i kamapim dispela hevi i go long han bilong lo.

Em i tok bihain long ol wok painim aut i pinis, gavman bai lukluk long mekim sampela peimen i go long famili bilong tupela man.



Wanpela Yunaitet sios lida i go pas long pablik memoriel sevis bilong leit Nicholas Goru Rarua na Toka Gaudi Toka long bikples Hanuabada long Nesenel Kapitel Distrik long Sande wik i go pinis. **Poto: Sape Metta**

Fioo pipel tingim wok bilong Gutnius

Paulus Tali i raitim

STAT bilong Lutheran Sios i kirap long Sattelberg eria , Morobe Provins, na i go inapim ol Hailans provins we bikpela Kristen sios i sanap nau.

Wanpela lain husat i bin go pas long autim Gutnius bilong Bikpela Jisas Kraiss, em ol papa tumbuna bilong ples Fioo insait long Finschhafen, Morobe Provins.

Ol i bin pas wantaim ol misineri na kisim Gutnius i go long ol haiden.

Tupela wik i go pinis, ol Kristen memba bilong ples Fioo i tingim bikpela wok ol tumbuna papa i bin mekim long autim Gutnius wantaim ol misineri i go long ol haiden na

mekim ol i kamap Kristen. Trinita Lutheran Sios bilong ples Fioo i bin singautim olgeta pikinini Fioo i stap long olgeta hap bilong PNG long bung na amamasim wok Gutnius long rot bilong givim tenksgiving ofa.

Moa long 1,000 manmeri pikinini i bin bung long dispela amamas de long bungim mani, singsing, givim kaikai i go i kam, lotu wantaim na tingim gutpela pasin God i mekim insait long wok bilong Kraiss long mekim olgeta lain manmeri i stap wanbel wantaim God.

Gutnius tasol em i kamapim wanbel namel long God na man.

Wanpela pikinini bilong ples Fioo em Lengkepe Zongoreng, Deputy Prinsipel Akademik long Balob Tisa

Kolis Lae,husat i mekim sampela tok bilong strongim ol Kristen long dispela bikpela de.

Mista Zongoreng i tok dispela em wanpela gutpela pasin Trinita Lutheran Sios long Fioo ples i mekim long luksave long ol olupela wokmanmeri na ol misineri husat i bin autim Gutnius na ol i dai.

Dispela bung tu i opim rot long ol Fioo pikinini i ken bung na luksave long ol yet na strongim Kristen bilip bilong ol.

Mista Zongoreng i tokaut long bel hevi bilong ol planti Kristen memba na ol lida long olgeta level bilong sios long pasin i stap long Ampo Lutheran het opis.

Bel hevi bilong ol em long pasin bilong toktok na stretim ol sios

memba taim ol i go long het opis long kisim helpim long mekim wok sios i go i kam.

Bikpela hevi em olsem, ol Kristen memba i lusim ples na go long het opis long kisim helpim, tasol ol i no save kisim helpim hariap.

Dispela i save westim taim na mani long wokabaut bilong ol na i mekim na wok bilong Gutnius i save pundaun.

Tasol Mista Zongoreng i tok dispela i no ken kamapim hevi long wok sios.

Em i tok sios i mas save olsem wok sios i gat hevi bilong en olsem na pasin bilong wok bung i mas stap namel long olgeta Kristen na het opis long wok sios i mas go yet, maski wanem kain hevi i kamap.

Dispela bung tu i kamapim pasin

bilong prea long wok sios i ken kamap gutpela.

Ol Kristen i bin pre long helpim ol misineri i stap long wok wantaim Lutheran sios na prea i sut long sinot 30 bai kamap long Heldsbach insait long Finschhafen long yia 2016.

ELCPNG Kate Distrik bai hostim. Wanpela singaut Mista Zongoreng i mekim i go long olgeta pikinini bilong Fioo i stap long olgeta hap bilong Papua Niugini olsem ol i mas salim helpim mani long kirapim Trinita Lutheran haus lotu long stretim na joinim haus lotu i go bikpela.

Em i tok, long pasin bilong givim samting i go long God bai strongim sios i sanap strong long graun.

I no gat gutpela as long muvim vot i no gat bilip long gavman

Palamen i sindaun long namba wan kibung bilong 2015 long dispela wik. I gat planti bikpela samting i stap long ol memba i mas paitim toktok na givim tok orait o nogat long en. Ol i mas lukluk long lo i givim tok orait long kilim ol kalabus husat i wet i stap long dai.

I mas gat moa toktok long ol asailam sika long Manus husat i kisim tok orait long sindaun hia long Papua Niugini. I gat ripot bilong polis modenaisesen program, i gat ripot bilong wok painimaut long Edukesen em palamenter komiti i bin go pas long en.

Dispela ripot i redi nau long givim i go long Palamen. Na wan wan memba tu i gat ol hevi bilong ilektoret em ol bai bringim i go long Palamen.

Tasol nius bilong dispela wik i toktok long Oposisen bai yusim dispela bung bilong Palamen long putim vot i no gat bilip long gavman bilong Prais Minista Peter O'Neill.

Ol tokwin i raun nabaut olsem planti memba bai kalap i go bung wantaim Oposisen na bai ol i muvim vot i no gat bilip long gavman. Dispela em i politiks bilong Papua Niugini we Oposisen bai mekim planti nois, tasol i no gat inap memba i sapotim ol.

I gat belhevi i bin kamap long



taim lida bilong Oposisen i senis olsem na ol i mas soim ol pipel bilong PNG olsem ol i stap strong na inap wok bung.

Wok bilong Oposisen em long putim was long gavman na salensim gavman sapos gavman i kamapim sampela asua. Oposisen i mas toktok long taim ol hevi i kamap long kantri. No ken pasim maus tasol na larim i go.

I bin gat planti bikpela hevi bilong lo na oda i bin kamap namel long mun Desemba las yia na Februari long dispela yia. Oposisen i bin opim maus na tingting bilong en tu long ol dispela hevi o nogat?

I mas gat gutpela na strongpela lida husat i no pret long opim maus na salensim gavman o husat lain i laik bagarapim kantri.

Watpo bai PNG i senisim gavman nau? Wanem gutpela as bilong muvim vot i no gat bilip? Na ol pipel bilong kantri bai sapotim Oposisen sapos i gat vot bilong no gat bilip i kamap? Dispela em sampela askim i stap long tingting bilong ol pipel long taim ol i harim tokwin bilong vot i no gat bilip.

Taim i sot nau bikos i gat tupela yia tasol i stap bipo long nesenel ileksen i kamap, olsem na watpo senisim gavman nau.

Mobeta Oposisen i pasim tok na yusim dispela tupela yia long redi long winim ileksen na ol i ken kamapim gavman. Kisim vot

bilong pipel long kamapim gavman.

PNG i bin senisim lo bilong muvim ol vot i no gat bilip kostu klostu bikos dispela pasin i save kamapim planti hevi tru long kantri. Gavman i no sindaun gut long mekim wok na ol investa na narapela kantri i no gat bilip tumas long PNG. Tude i gat bikpela wok i kamap long olgeta hap bilong kantri.

Sampela developmen i kamapim gutpela senis. Sampela i no karim kaikai yet, tasol i gat gutpela bilong en bai kamap. I gat planti salens tu i kamap long dispela taim.

Sapos Oposisen i pairap bai gavman i luksave olsem i gat man i putim was na salensim em sapos em i popaia liklik.

Mak bilong trupela lida em long kamap wokman bilong pipel. Harim krai bilong pipel na helpim long painim gupela rot bilong stretim. Dispela pasin bilong paitim bros na tingting tasol long apim nem na kisim pawa, bai i no inap helpim ol liklik manmeri bilong PNG.

Ol politisen i mas luksave long dispela na no ken westim taim bilong Palamen long muvim vot i no gat bilip sapos i no gat gutpela as bilong kamapim dispela vot.

Kisim sapot bilong ol pipel pastaim na wetim 2017 ileksen long soim kala na save bilong yu long kamapim gavman.

Tkatchenko kirapim TVET trening senta long Koki

OL yut husat i save raun na sindaun nating long Koki, Badili, Kaugere, KilaKila, Sabama na Hos Kem long Pot Mosbi bai gat sans long go na kisim teknikel skils trening long wanpela nupela TVet trening senta long Koki em memba bilong Mosbi Saut Justin Tkatchenko i kirapim. Prais minista Peter O'Neill i bin opim dispela nupela trening senta long wik i go pinis.

Prais Minista i bin opim dispela senta long wankain taim em i bin opim nupela Koki maket.

Long taim bilong opim dispela trening senta, Mista Tkatchenko i tok em i luksave olsem planti ol yut long ilektoret bilong em i wok long stap na raun nating.

Em i tok taim ol i wok long mekim olsem, tingting nogut i save kamap na dispela ol yut bai i ken go na kamapim ol bikhet na trabel pasin insait long komyuniti bilong ol. "Dispela em i no gutpela,



Prais Minista Peter O'Neill i katim riben na opim dispela TVet trening senta long Koki, NCD.

Poto: Sape Metta

long wanem, taim ol yut i mekim olsem, ol i ken bringim pret pasin na bagarapim gutpela sindaun insait long ol komyuniti," Mista Tkatchenko i tok.

Em i tok taim em i lukluk na skelim, em i ting ating gavman i mas kamapim strongpela tingting long givim sans long ol yut.

Na olsem memba i makim ol yut long ilektoret bilong em, Mista Tkatchenko i

pasim tingting long kirapim dispela trening senta we ol yut gat sans long go trening, kisim skils trening, painim na kisim wok na stretim gut laip bilong ol.

Mista Tkatchenko i tok amamas long O'Neill/Dion gavman na Gavana bilong NCD Powes Parkop long sapotim em long kirapim dispela senta.

Dispela senta bai givim skils trening bilong samap,

kuk, buk kiping na akaunting, sels na maketing, infomesen teknologi, kompiuta trening, Infomel sekta bisnis na SME menesmen na planti moa ol arapela tred trening.

Em i tok trening senta i wanpela developmen gavman i bringim i go long ol yut na pipel bilong Mosbi Saut, olsem na em i mekim strongpela singaut i go long ol long kamap papa bilong senta na yusim na lukautim gut dis-

Published Weekly, Thursday, for Word Publishing Company, Ltd.

P.O. Box 1982, Boroko, NCD

Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Websait: www.wantokniuspepa.com

Pe bilong wanpela via. 52 niuspepa

Ples:

PNG

AUSTRALIA

ASIA PACIFIC na JAPAN

AMERICA na EUROPE

Air:

K220.00

US\$110.00

US\$150.00

US\$210.00

General Manager

Elizabeth Konga

Editor

Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Asples i stap...

Tasol planti i no save long ples

Sape Metta i raitim

LONG 1950's, 60's na 70's lo bilong kastom na tredisen lo pasin tumbuna i bin sanap na i stap strong tru long pasin bilong no ken marit ausait long hauslain na wanpinis lain bilong mipela yet.

Marit nabaut ausait yet long hauslain na viles komyuniti bilong mipela yet em ol tumbuna i no tok orait long en, long wanem, dispela pasin bilong marit nabaut i ken bagarapim planti pasin tumbuna bilip.

Tasol bihain long ol waitman i kam na bringim edukesen na western kalsa i kam insait, ol pasin tumbuna bilong yumi i stat long senis na i wok long dai hariap.

Ol yangpela bilong yumi i stat long kisim ol kain kain pasin bilong ol ausait kalsa na planti senis tu i kamap.

Wanpela long ol senis i kamap long pasin bilong marit i go i kam ausait long hauslain komyuniti na wanpinis lain bilong yumi yet. Long mekim kliia dispela hap tok, i no gat tambu nau long man Goroka bai i ken maritim meri Sepik, na meri Ji-waka i ken maritim man Madang. Lo bilong tumbuna em i no moa pasim o banisim dispela pasin nau.

Dispela pasin bilong marit i go i kam i kamap strong long ol bikipela senta long ol skul, ples bilong wok na ol narapela ples bung we ol man na meri bai bung, wokim pren pasin, marit na kamapim famili.

Taim dispela i kamap, ol man na meri bai kamapim ol pikinini, na planti taim dispela ol pikinini i no save gut long ol asples stret bilong ol.

Bikos mama i karim planti long ol ausait long hauslain na ples stret bilong ol, ol i save paul, long wanem, ol i save istap tasol long dispela senta na planti long ol i no save long asples bilong mama o papa bilong ol.

Long wankain pasin, planti ol papa na mama bilong dispela ol pikinini tu i no save long asples bilong ol, long wanem, taim mama i karim ol, ol tu i no save long asples bilong ol stret.

Dispela pasin i stap long planti ol lain bilong yumi insait long PNG.

Olsem wanpela papa, mi tu mi wanpela long ol man husat i no save gut long asples bilong mi. Na bihainim mi, meri bilong mi wantaim ol pikinini na ol tumbuna bilong mi i no save long asples bilong ol.

Na long mi yet, Goroka long Isten Hailans i olsem namba tu asples na provins bilong mi, long wanem, mi bin marit long Helen husat i kam yet long Usire hauslain long Yagana LLG eria long Okapa distrik long Isten Hailans yet.

Bihain long marit, mitupela i karim tripela pikinini.

Pikinini man Nasepol i gat 24 krismas, Mou 16 krismas na Bromkey 14 krismas. Dispela ol pikinini em mama Helen i bin karim ol na ol i groap long Goroka yet.

Long mi yet, mama i bin karim mi long Papuan Kompaun long Lae, Morobe provins.

Mi bin groap, go long praimer na hai skul long Lae yet long 1960's na



Nius ripota bilong Wantok Niuspepa, Sape Metta (blek siot) wantaim famili na ol wantok i lusim Siapea Haro long dingi na ran i go ong Savaiviri viles long Galp provins.



Em i namba wan taim stret bilong Mou, mama Helen na Bromkey long kalap long kanu, pul na swim long bikipela Tauri Riva long Savaiviri viles long Galp provins.



Maski sapes em i lusim ples na i stap longpela taim long Goroka, Isten Hailans, Ripota Sape Metta i painim sampela taim long sindaun na stretim net o umben bilong painim pis long nambis bilong HamuHamu hauslain long Galp provins.

1970's.

Bihain long pinisim hai skul long Lae, mi bin lusim dispela ples na raun i go antap long Goroka sampela taim long 1974.

Nau yet mi stap na wok long Goroka inap long 40-krismas.

Asples bilong mi em long Loutova o Savaiviri long Galp provins.

Em ples bilong papa we i stap long hetwara bilong bikipela Tauri Riva, na ples bilong mama em long Heits Mafu o HamuHamu we i stap long si bruk nambis long kos lain bilong Is Kerema long Malalua distrik long Galp provins. Mi hapkas pikinini bilong dispela tupela hauslain.

Long las tripela krismas (2011 – 2013) mi wanpela yet i bin raun i go i kam long ples, long wanem, planti

toktok bilong wel, ges na LNG projek i wok long kamap.

Na olsem wanpela papagraun, mi mas kamap long ples, lukluk na harim wanem ol samting iwok develop na kamap long ples.

Long 2014 taim mi laik stretim ol samtin long go bek ken long ples, Helen na ol pikinini em Nasepol, Mou na Bromkey i presarim mi na tok, "papa, watpo na yu yet i wok long i go i kam long ples na larim mipela i stap bek? Mipela tu i laik go long ples na lukim graun, bus, wara, ol famili na wantok bilong mipela".

Dispela em i wanpela bikipela askim tru na mi tokim ol, atin em i gutpela taim nau long mi mas kisim yupela i long ples.

Na long dispela tingting, mipela i stat long mekim plen long stat bilong 2014.

Taim dispela tingting i kamap, mipela i wokim gut plen na beten long Papa God long helpim mipela long kamapim ol fan resing wok.

Mipela i sevim sampela liklik mani na long Novemba las yia, mipela i baim ol balus tiket na long Disemba, mipela i lusim Goroka na flai i kam long Pot Mosbi.

Long kalap long balus na lusim Goroka na kam long Pot Mosbi, em i namba wan taim stret bilong Mou wantaim Bromkey. Dispela i mekim na bringim planti aiwara long mi na mama bilong tupela.

Mipela i pundaun na stap long Pot Mosbi inap wanpela wik tasol long stretim gut ol samting bipo long mipela i ran bihainim Hiritano Haiwe i go long Siapea Haro, Galp provins.

Long Siapea Haro, Mou wantaim Bromkey i kamap wantaim narapela nupela eksperiens, na dispela em long kalap namba wan taim long dingi na ran i go long ples long Loutova na bihain i go moa long Heits Mafu.

Taim mipela i kamap long ples long Loutova, planti moa aiwara i pundaun taim mipela i lukim ol famili na wantok.

Ples em i stap na mipela i go daun na lukim, wankain olsem dispela singsing bilong Robert Oeka wantaim Hollie Maea ben, "Kerema yu no save yu yet kam na lukim."

Tingting long dispela singsing, Mou i tok maski sapos em i gat 16 krismas na em i namba wan taim bilong em long go long ples bilong mi, em i amamas olsem em yet i go a lukim ples.

"Bikipela tok amamas bilong mi i go long papa bilong mi long wanem, em yet i bin mekim planti hatwok long bungim liklik mani na sponsaim dispela wokabout bilong mipela i go long ples," Mou i tok.

Em i tok i luk olsem em wantaim brata Nasepol, susa Bromkey na mama Helen i lukim driman bilong ol i karim kaikai na kamap tru na ol yet igo na lukim ples.

Long ples, mipela i luksave olsem i no long taim planti samting bai kamap na senisim ples long wanem, ol wokman na meri bilong Inter Oil i wok long kamapim ol sevei wok raunim ples stat long Isten sait bilong Kerema long Malalua i go olsem long Koaru na bai go olsem long lokea na Sepoe. Na bihain liklik, wok i go bek ken long Malalua.

Nau yet planti toktok i kamap pinis olsem i no long taim nau, ol bikipela kampani bilong painim wel na ges bai muv i go insait long mekim wok long ples.

Taim ol i mekim olsem, ol bai muvumi ol pleslain long ples i go aut na mekim wok i go het insait long ol viles na hauslain long dispela ol eria insait long Malalua distrik.

Tru, olsem ol pipel long dispela ol eria i wanbel long larim wok projek bilong LNG i go het, tasol ol i no save long ol hevi we i wok long kam bihain.

Ol pikinini na ol tumbuna i ken kisim taim long bihain long wanem, taim projek i kamap na i pinis, tru tumas bikipela bagarap i ken kamap long graun, bus, wara na ol hauslain tu.

Taim mipela ir aun long ples, mipela i luksave olsem LNG bai bringim wok bilong wel na ges i go long ples, tasol i no gat wanpela gutpela developmen na gavman sevis em i stap insait long ol hauslain na viles komyuniti.

I no gat ol gutpela klasrum, etpos na ol narapela gavman sevis we ol pipel i ken go na kisim sevis.

Long Heits Mafu, mipela i witnesim wanpela mama i karim pikinini long haus bilong em yet.

Na em i no seif long wanem, em i no kisim wanpela medikel tritmen bihain long emi karim pikinini.

Etpos long hap i bin pas na i no operet long las 30 yia. Wankain long etpos bilong Loutova tu.

Dispela i mekim na planti mama na ol pikinini tu, i no long Heits Mafu na Loutova tasol, long ol arapela viles na haus lain tu husat i wok long dai na lusim laip bilong ol yet long taim bilong karim.

Ol mama na ol siklain tu i save painim hat tru long go long ol helt senta long Malalua gavman stesen, Koaru na Terapo misin stesim long kisim helpim long karim pikinini, na kisim marasin tu.

Na hamas moa ol mama na pikinini bai dai yet sapos nesenel na provinsel gavman i no lukluk na traim long adresim dispela isu bilong helt bilong ol mama na ol siklain long planti ol hauslain na viles long Isten sait bilong Galp provins.

Ol klasrum na edukesen sevis long praimer na elementeri skul i no gutpela.

Plantil ol skul fesiliti insait long ol hauslain na viles komyuniti i bruk nabaut, tasol ol ples lain i wok long yusim yet long wanem, ol i no gat ol arapela fesiliti i stap long ol iken yusim long skulim na lainim ol sumatin long ples.

Dispela i mekim na Galp provins ig o daun tru long humen risos developmen.

Taim ol arapela senta i wok long mekim gut na i go pas long edukesen, Galp i wok long go daun na i wok long mis aut long planti gutpela sans bilong kisim gutpela edukesen na humen risos developmen.

Long ol arapela ektiviti autsait long LNG projek, Galp i gat planti ol arapela samtin long mekim. Sampela long ol em wok bilong lukautim pik na painim pis na ol arapela abus bilong solwara.

Dispela ol wok i ken pulim planti mani, tasol ol i pipel yet i no tingting tumas long dispela na lukluk tasol long dispela developmen na benefit em LNG bai bringim i go long ol.

Ol pikinini bilong mi i bin amamas tru long harim na luksave long dispela ol developmen na benefit bilong LNG projek we bai go ong ples bilong ol.

Tasol bikipela tingting na salens i sanap olsem, LNG i ken kam na bringim ol benefit, tasol wanpela taim bihain em bai stopim operesen na i go, na kisim ol benefit tu wantaim.

Taim LNG kirap na i go, sindaun gut na amamas long ples bilong em wantaim dispela ol bikipela benefit em i kisim, sindaun bilong ol pikinini na tumbuna bilong Galp long bihain taim em bai olsem wanem?

Ol Enga karim kalsa long baim meri i kam long siti

Joylyne Karato
UPNG sumatin i raitim

PASIN bilong peim brait prais long meri i go antap olsem k100,000 i go antap long K2 milien long Enga provins i bin stat long yia 2000.

Long pasin tumbuna, ol i save baim meri wantaim kina sel na pik tasol nau bikpela senis i kamap we ol mama na papa bilong pikinini meri i givim pik na mani i go long lain bilong man.

Taim bilong makim meri, ol man i save slip long haus man bilong ol na ol i no save prenim ol meri. Papa na mama bilong ol i save prenim ol meri, tasol ol yet i no save lukim pes go kam.

Ol meri tu i no save lukim man, tasol ol i save karim kaikai go long haus bilong ol na helpim papa na mama bilong man long wokim gaden.

Taim papa bilong man i go toksave long pikinini bilong em olsem ol pik na kina sel redi pinis long baim meri, pikinini man i kisim planti tingting wanem kain meri stret em bai maritim.

Bipo long em i kam ausait long makim meri, ol man i save bilasim em wantaim tumbuna bilas na putim pig gris long skin bilong ol. Na kam aut we ol man na meri insait long komyuniti i ken lukim em olsem taim bilong em long marit i kam pinis.

Olgeta gel pren bilong em we i save karim kaikai i go kam tu i dres ap na lain ap long pes bilong man.

Man i save skelim ol meri, na sapos em i lukim wanpela i gutpela stret long ai bilong em, em i makim em long kamap meri bilong em.

Na long taim bilong givim pei mani long dispela meri, ol i ken pasim pik tasol na 2-pela kina sel long papa na mama bilong meri.

Nau kalsa bilong ol Enga i senis we ol i kisim dispela pasin i stap long ples i karim kam long Mosbi we ol meri bilas na singim ol tumbuna singsing bilong marit na tu, givim brait prais.



Tumbuna pasin i senis we nau ol man ol yet i makim meri bilong ol yet na putim bikpela pe long ol winim pasin bilong bipo.

Long nau sapos wanpela man i laikim wanpela meri, em i toksave long lain bilong em long bilas na singsing i go long ples bilong man.

Taim ol meri i bilas i stap, lain bilong ol i kisim mak olsem 10-pela pig we ol i save karim i go long ples bilong man na lain bilong man i katim na skelim long famili billong man we bai baim dispela meri.

3-pela meri i save bilas long go lusim wanpela meri husat bai marit na kolim nem bilong ol sif bilong hauslain bilong man long kam na go givim pe long ol.

Olgeta 3-pela meri i bilas as nating na amamas na kalap long kisim pik na mani we ol bos kru tu bai sanap baksait na singim ol tenkyu singsing.

Bihain long 2-pela wik, ol bai go na givim ol pe long lain bilong meri. Ol lain bilong meri bai redim kaikai bilong ol i stap na bikpela pati i save kamap.

Long Enga provins olgeta krismas em i taim bilong ol man i save stap long ol narapela provins na kantri i ken go long ples long givim brait prais long ol meri, we olgeta hai kar bilong Hagen Ela motors save pinis.

Long nau long baim meri, papa na mama i save kontribut long skel bilong ol tasol. Em yet bai putim bikpela mani na pik pastaim long ol narapela famili i ken kontribut.

Wanpela gutpela pasin ol Enga i gat i olsem, ol i save baim skul fi bilong pikinini man long ol i ken kamap wanpela saveman, na bihain ol yet bai baim meri bilong ol we ol bai i no inap hat wok gen painim pik na mani.

Pasin bilong givim brait prais pemen long meri i kam pinis long Mosbi olsem yumi lukim tupela meri i bilas gut long kisim pementaim wanpela bilong tupela i laik marit.



SOIM KALSA: Ol sumatin i amamas long soim hailans tumbuna bilas long selebretim kalsa de insait long wanpela skul long Mosbi. Poto: Wantok Fail



HAILANS BILAS: Tupela yangpela Hailans sumatin man na meri i skul insait long Nesenel Kapitel Distrik i putim naispela bilas long soim pasin kalsa bilong ol. Sumatin man i putim kina sel nekles. Poto: Wantok Fail

RADIO AUSTRALIA TOK PISIN PROGRAM
HARIM LONG: 101.9 FM

6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Spots
7.30PM Nius na Karen Afeas
8PM Helt
8.15PM Musik
8.30PM NIUS
8.40PM Spots Riplei
8.55PM Musik
9PM Stesen Pas

TUNDE - *Morning - Nait*
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karen Afeas
8PM Mama Graun
8.15PM Musik/Spots
8.30PM NIUS
8.40PM Helt Riplei
8.55PM Musik
9PM Stesen Pas

TRINDE - *Morning - Nait*
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karen Afeas
8PM Focus
8.15PM Musik/Spots
8.30PM NIUS
8.40PM Mama Graun Riplei
8.55PM Musik
9PM Stesen Pas

FONDE - *Morning - Nait*
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karen Afeas
8PM Youth
8.15PM Musik/Spots
8.30PM NIUS
8.40PM Focus Riplei
8.55PM Musik
9PM Stesen Pas

FRAIDE - *Morning - Nait*
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karen Afeas
8PM Wantok
8.15PM Musik
8.30PM NIUS
8.40PM Youth Riplei
8.55PM Musik
9PM Stesen Pas

SARERE - *Nait*
7PM Stesen op - Ol Nius Hetlain/Program Priviu
7.05PM Musik na Chit Chat
7.30PM Nius
7.40PM Wantok
8PM Lokal Ben
8.30PM Nius
8.40PM Musik/Chit Chat
9PM Stesen Pas

SANDE - *Nait*
7PM Stesen op - Ol Nius Hetlain/Program Priviu
7.05PM Musik na Chit Chat
7.30PM Nius
7.40PM Femili Blong Serah (Radio Plei)
8PM Lukluk Bek Long Wik
8.30PM Nius
8.40PM Musik/Chit Chat
9PM Stesen Pas

MLTR Fen kam olgeta long Kokopo

Andrew Mait i sanap wantaim ol ben memba bilong MLTR. Poto Nicky Bernard.

3:30 AM G	<u>AUSTRALIA NETWORK</u>
6:30 AM G	<u>EMTV NEWS REPLAY</u>
7:00 AM G	<u>HILLSONG</u>
7:30 AM G	<u>AUSTRALIA NETWORK</u>
9:00 AM G	<u>BUSINESS PNG YR.3 EP#38 rpt</u>
9:30 AM G	<u>AMAZING SPIES Ep #4</u>
10:00 AM G	<u>OLSEM WANEM EP#39-- RPT</u>
10:30 AM G	<u>RESOURCE PNG EP#37 -- Rpt</u>
11:00 AM G	<u>ITALIAN KHANNA Ep #2</u>
11:30 AM G	<u>ITALIAN KHANNA Ep #3</u>
12:00 PMG	<u>AUSTRALIA NETWORK</u>
5:30 PM G	<u>LOVE PATROL S6 Ep #02</u>
6:00 PM G	<u>EMTV NATIONAL NEWS</u>
6:30 PM G	<u>VOCAL FUSION S1 -- Ep#11</u>
7:30 PM G	<u>TOK PIKSA - EP#2014/44</u>

Ol poto nabaut



HARBOURSIDE HOTEL: Olsem hap long helpim ol pipel bilong Manus taim Australia i putim asailam sika ditensen senta long Manus, gavman bilong Australia i bin bildim moa rum na mekim gut ol samting long dispela hotel wantaim mani mak inap long K12.9 milien. Poto i soim ol bikman na meri long taim Gavman bilong Australia i opim na givim hotel i go long Manus Provinsel Gavman na ol papa bilong hotel.



NUPELA LORENGAU MAKET: Ol manmeri i wokabaut i go long nupea Lorengau Taun maketol i bin opim i no long taim i go pinis. Gavman bilong Australia i bin tromoim K7.2 milien long streti, mekim bikipela na bildim ol nupela toilet blok, ples bilong ol pikinini i pilai long en, na wokim ruf bilong maket haus.



LUNDRET PRAIMERI SUMATIN: Ol sumatin bilong Lundret Praimeri skul long Manus long nupela klasrum we ol i bin bildim wantaim helpim mani bilong gavman bilong Australia. Pekej long stretim, mekim bikipela na bildim ol nupela skul bilding em ol i wokim long 20 skul insait long Manus Provins.



olpotokanagelaipplain

Raun wantaim Kanage olgeta wik

Plastesin o Plantesin...

Ol famili bilong Kanage sindaun stori long nupela Stendet Bes Edukesen (SBE) i kamap nau. Ol pikinini tokim Kanage. "Papa dispela kain sistem em bilong bipo ah? Ol prep i save slip 1 aua?" Na Kanage bekim na tok, "Yes yah. Em taim bilong slip na taim bilong mipela save pilai long plantesin tasol! Na mi yah mi no save wokim narapela samting. Olgeta taim mi save wokim snek na bol bilong man tasol na givim long tisa." Oloman! Ol pikinini i lap dai na tok - papa yu minim "plastessin" o "plantesen?" Na Kanage tok, "O yes yah, mi paol. Em plastessin tasol ya!"

Noken Dinau...

Kanage wokim wanpela tred stoa.



Kanage kisim pinis pe bilong em na em baim olgeta stok bilong tred stoa na putim notis "No Ken dinaul!" Tasol wanpela brata bilong em oltaim save kam grisim ol pikinini bilong Kanage na em save dinau long stoa.

Kanage bel kas kas tru long dispela. Neks taim Kanage i laik go ken long kisim kago bilong em, givim strongpela tok lukaut long ol pikinini bilong em. "Sapos ankol bilong yupela i kam ken no ken givim em dinau, yupela harim?" na ol pikinini tok, "Yes papa!" Nau papa giaman long go na taim ol pikinini i

no lukluk, em i go hait aninit long wanpela sel (kenvas) arere long stoa na wet i stap.

Ol stap liklik em ankol ron i kam na askim. "Ol pikinini, daddy stap?" Ol pikinini tok, "Nogat, em go long taun, bihain orait yu ken kam na lukim em."

Ankol tok, "Ah em orait, nogat samting. Mi kam long kisim sel bilong mi yah!"

Oloman! Ankol rausim sel ya nogat. Kanage daun em het na sindaun i stap! Ah, ah, ah!

Ol skwat!
Salim ol gutpela Kanage tok pilai i kam long:
Kanage Tok Pilai
P.O. Box 1982,
Boroko, NCD
Port Moresby.
Email: jwilson@wantok.com.pg

Mi gat wari na mi laik helpim

Dia Laipplain,
Mi wanpela pastor na mi save mekim wok bilong God, tasol mi save wari tru.

Mi no gat helpim i kam long laip bilong mi, olsem na mi save wari tru. Mi tingting long lusim wok na painim wok mani, em wari bilong mi.

Namba tu em, mi no gat skul fi bilong baim skul fi. Em hevi bilong mi. Ol 4-pela pikinini bilong mi i stap long skul na mi painim hat tru long kisim mani na baim skul fi bilong ol.

Plis wanem samting yupela i tok tok long en inap long yupela tokaut long mi long pas.

Em tasol tupela wari bilong mi na God i blesim yu.
WORRIED PASTOR

Dia Pastor Simon
Tenkyu long pas bilong yu i kam



long Laipplain wantaim bel hevi bilong yu.

Mipela i luksave pinis long wari bilong yu long yu yet wantaim ol pikinini bilong yu.

Pasto, mipela i bel sori long yu wantaim pikinini long skul fi bilong ol. Mipela i laik tok liklik long wok bilong sios olsem, sios em i no olsem bisnis wok, em i wok bisnis bilong God.

I moabeta long tokim Papa God long prea na mekim wok penens.

Askim Papa God, mi mekim wanem?

Bikos yu stap insait long bisnis

bilong God, mipela i bilip olsem Papa God yet bai lukautim yu.

Yu kamaut no gut bai yu painim birua. Gutpela yu stap wantaim Papa God. Buk Baibel i tok "Askim na bai yu kisim".

Askim em long stretpela pasim na tingting. Yu em bisnis bilong Papa God, tokim em; em bai ansaim yu.

Pren bilong yu,
Laipplain.

Sapos yu gat wari o hevi, rait i kam long dispela etres: Lifeline Counselling Services, P.O. Box 6047, BOROKO, National Capital District, PNG. Yu ken ringim opis long telepon namba 3260011 o 3261680. O sapos yu stap long NCD, kam na lukim mipela long opis bilong mipela long Waigani. Mipela i no inap putim trupela nem bilong yu long niuspepa, tasol mipela bai putim ol wari na hevi bilong yu.
Laipalai



SOLWARA KARIM: Solwara i wok long karim graun na bagarapim Lorengau i go long Momote rot. Dispela projek bilong stretim rot na bris bai wokim si wol na apim na stretim rot long abrusim solwara i bagarapim.

LONIUI BRIS: Loniui Bris i wanpela long tripela rot na bris stretim wok projek we gavman bilong Australia i patna wantaim PNG Works na Manus Provinsel Edministresen long manimak inap long K36 milien. Kontrakta bai mekim ol wok em Shamrock Civil. Wok i bin stat long Loniui Bris na olgeta tripela projek bai kisim 12-pela mun long pinisim.

Ol Poto: Australia Dipatmen ov Foren Afeas na Tred.



Ol Wes Papua na Papua indipendens sapota long Indonesia Poto: : ABC

Ol sios egensim lo bilong kilim kalabus

Ol sios i tok Papua Niugini em i Kristen kantri na i no ken kilim ol kalabus. Ol i singaut nau long Gavman i mas rausim dispela lo bilong kilim ol kalabus.

Dispela ripot bilong ABC i tok ol sios long kantri bihainim ol nius ripot olsem kantri i redi nau long stat kilim ol pipel husat i bin kilim ol narapela na ol i stap nau long kalabus na wetim gavman long kilim ol.

Ol ripot i bin tok olsem kot i salim 14 pipel long dai. Na taim ol i stap long kalabus, wanpela i bin dai na wanpela i bin ranawe na nau i gat 12-pela tasol i stap.

Minista blong Koreksenel Sevis Jim Simatab i tok olsem Indonesia na Tailan i gat dispela lo bilong kilim ol pipel husat i brukim ol bikpela lo i redi long helpim Papua Niugini long redi gut dispela lo bilong kilim kalabusman.

Ol i tok Indonesia bai helpim PNG long ol rot blong yusim gan na sutim dai kalabusman, na Tailan bai helpim long rot bilong hangamapim kalabusman.

Tasol ol sios i tok ol i no wanbel tru long. Fr victor Roche Seketeri Jeneral bilong PNG and Solomon Ailan Katolik Bisop Konprens i tok Katolik sios i no wanbel long dispela lo bilong gavman na ol i no ken bihainim.

Narapela sios lida, Rev Jack Urame, wanpela risetsa bilong Melanesian Institute long Isten Hailans i tok gavman i mas painim narapela rot long givim mekimsave long ol dispela kalabusman.

Dunstan Guli wanpela listena bilong progrem long Pangia long Hailans rijon i tok em i no sapotim dispela lo.

Mista Guli i tok tu olsem gavman i mas tingting gut long wanem long kalsa bilong sampla hap bilong kantri i gat pasin bilong bekim i strong yet.

Gavana Juffa go long Oposisen

Gavana bilong Oro provins, Gary Juffa i tok em bai no inap pasim maus bilong en long toktok

egensim ol lo bilong gavman we em i lukim i nogut long ol pipel.

Gavana bilong Oro provins i tok em bai no inap pasim maus bilong en long toktok egensim ol lo bilong gavman we em i lukim i no gut long ol pipel.

Gary Juffa, i mekim dispela toktok bihain long gavman bilong Praim Minista Peter O'Neill i bin rausim em long gavman na tokim em long joinim Oposisen.

People's National Congress Pati i bin salim wanpela pas i go long Mista Juffa na tokim em olsem olgeta memba i bin vot long rausim em long gavman bens.

Mista Juffa i wanpela man husat i save mekim ol strongpla toktok egensim sampela bikpela tingting bilong gavman winim ol narapela Palamen memba.

Mista Juffa i tok olsem em i ting ol strongpela toktok em i save mekim long ol kain samting olsem seabed maining, na spesel egrikalsa bisnis lis i mekim gavman i rausim em.

Ol PNG Gavana i sapotim PM O'Neill long Wes Papua

Caroline Tiriman

Gavana bilong Nesenel Kapital Distrik Powes Parkop na Gavana bilong Oro Provins Gary Juffa i tok sapot bilong Praim Minista O'Neill long ol pipel blong Papua na Wes Papua em i gutpela tru.

Tupela Gavana i tok ol i sapotim tru toktok bilong Praim Minista Peter O'Neill long toktok moa long ol wari bilong ol pipel blong Wes Papua.

Mista O'Neill i bin autim dispela sapot bilong em long wanpela miting bilong ol lida long Mosbi long wik i go pinis olsem taim em i kamap pinis long tokaut long i bikpela wari em ol Melanesia pipel long Wes Papua i wok long bungim nau.

Mista Parkop i askim tu Presiden Joko Widodo bilong Indonesia long wokbung wantaim PNG gavman long stretim ol wari bilong ol pipel bilong Papua na Wes Papua.

Gavana Parkop i wanpela strongpla sapota bilong ol Wes

Papua pipel na em i save mekim ol strongpela toktok olgeta taim egensim Indonesia.

Long yia 2013 gavman bilong Praim Minista O'Neill i no bin inap stopim em na ol Wes Papua pipel apim Morning Star plak bilong Wes Papua independence muvmen autsait long opis bilong em long Mosbi.

Nau em i tok em i kirap nogut long dispela toktok bilong Mista O'Neill, tasol em i tok em i amamas long dispela toktok bilong Mista O'Neill.

Narapela lida husat i wok long mekim planti toktok long wari bilong ol Wes Papua na ol Papua pipel em Gavana bilong Oro provins Gary Juffa, husat i tok em i wanbel wantaim Mista O'Neill.

Gary Juffa, nau sampela Palaman memba i wari olsem dispela toktok bilong Mista O'Neill bai inap bagarapim ol wokbung wantaim Indonesia. Tasol Gavana Parkop i tok Indonesia i mas luksave olsem ol pipel bilong Wes Papua na Papua em ol Melanesia pipel.

Solomon Ailan Banana Festival i pulim ol turis

Makira provins long Solomon Ailan i redi long holim namba tu Banana Festival long mun Jun.

Banana em i wanpela impoten kaikai long laip bilong yumi long Pasifik ailan kantri, tasol long ailan bilong Makira long Solomon Ailan, em i bikpela moa yet.

Ol pipel bilong Makira long Makira Ulawa provins i gat moa long 100 kain kain banana, na ol i save kaikai banana tupela taim long olgeta de.

Siaman bilong Turis Makira Island, Noel Mamau i tok ol pipel bilong Makira i save kisim taim tu long ol pipel bilong narapela ailan i save tok bilas long ol bikos ol i gat planti kain kain banana long provins bilong ol.

Tasol em i tok ol i luksave long banana na i wok long promotim banana long kalsa, turis na bisnis long Makira.

Msta Mamau i tok namba wan Makira Banana Festival long 2014 i bin kamap gut tru na ol i redi long holim narapela gen long mun Jun long dispela yia.

Ol Raun Nabaut Poto



GOROKA TAISMAN: Lukaut long ol dispela taisman o mudman bilong Goroka i redi long sut wantaim spia na bunara bilong ol olsem poto bilong Goroka Wantok Stringa, Sape Metta i soim.



YAMI NAISWAN !! Ol mama na pikinini bilong ples Sivaiviri long Galp Provins i kukim saksak na kuka antap long paia na wet i stsap long ol kaikai i tan. Naispela kaikai stret ya! Poto: Sape Metta



ELA BIS :Tru olsem ol pasin amamas bilong skul malolo taim i pinis na skul emi stat pinis. Tasol long dispela tupela yangpela brata bilong Fisamens Ailan, i luk olsem pasin amamas i no pinis yet. Tupela i swim long Ela Bis taim Wantok Nius i bungim ol. Poto: Sape Metta

Puma Energy i no kontrolim fiul prais

Stanley Nondol i raitim

PRAIS bilong fiul i kam daun yet long dispela mun olsem las mun bikos prais bilong oil i kam daun long wol maket.

Independen Konsuma na Kompetisen Komisin (ICCC) i tokaut long dispela bihain long em i kisim tok save i kam long bikipela fiul saplaia, Puma Energy las wik.

Jeneral Menesa bilong Puma Energy, Peter Diezmann i tokaut pinis olsem kampani i no gat kontrol long apim o daunim prais bilong fiul. Em i tok prais bilong fiul em i

samting bilong wol maket. Taim wol maket i gat planti saplai bilong fiul, prais i ken kam daun na prais i ken go antap taim saplai i sot.

Prais bilong fiul long lokal ritel maket bai kam daun na ol pipel i baim long liklik mani bihain long prais bilong oil long wol maket i pundaun long sampela mun i go pinis.

Bikpela saplaia bilong fiul long kantri, Puma Energy i tokaut olsem ritel prais bilong fiul i kam daun bikos saplai bilong oil long wol maket i go antap na prais i kam daun.

Independen Konsuma na Kompetisen Komisin (ICCC) i tok prais bilong petrol, disil

na kerosin long mun Janueri i kam daun na long mun Febueri tu prais i kam daun

Sif Eksektiv Opisa (CEO) bilong ICCC, Dokta Billy Manoka i tok prais bilong ol fiul i kam daun bikos prais bilong oil long wol maket tu i bin go daun.

Prais bilong oil long wol maket i kam daun bikos ol bikipela kantri we i gat oil, i salim planti oil tumas long maket olsem na prais i kam daun.

Amerika i salim bikipela oil long maket na

Ogenaisesen bilong Petroleum Ekspoting Kantris (OPEC) i apim prodaksen na oil saplai bilong ol kantri long Midel Is olsem, Iran na Irak i go antap.

Prais bilong oil bai kam daun yet long 2015. Na prais bilong oil long PNG tu bai kam daun long ol mun i kam.

Ol senis bilong oil prais long wol maket i lukim prais bilong kerosin, disil na petrol long PNG tu i kam daun long dispela mun na bai kam daun yet long ol mun i kam.

Ramu NiCo tokaut long nupela bod siaman

RAMU NiCo Menesmen (MCC) i tokaut long nupela bod siaman ol i makim i no long taim i go pinis. Nem bilong nupela bod siaman em Zong Shaoxing.

Kampani i tokaut long dispela insait long wanpela spesel miting long las mun we olgeta senia menesmen i bin sindaun na tok save i kamap long video konpresns i kam long Beijing Saina, na Kurumbukari Main long Usino-Bundi, Basamuk Rifaineri long Raikos na Madang taun i harim

Mista Zong i kisim ples bilong Zhao Shimin, husat Metulujikal Kopresen bilong Saina (MCC) i makim long 2013, tasol em i stap moa long wanpela yia na i ritai long wok.

Nupela bod siaman Mista Zong pastaim i wok olsem vais presiden bilong bikipela ensinia kampani ol i kolim Saina ENFI Engineering Corporation na bihain ol i makim em tu olsem sif fainensel opereta. Em i gat bikipela save long sait long akaunting, fainens na ekonomik menesmen.

Mista Zong em i namba tri siaman nau bilong dispela namba wan bikipela nikel/kobalt projek long PNG. Namba wan siameri husat i bringim projek long nupela taim i go kamap long operesen em Madam Luo Shu.

Mista Zong i joinim Ramu NiCo Projek wantaim bikipela menesmen save na em i kam long taim we Ramu Projek i nidim tru strongpela menesmen long subim projek i go fowat na abrusim ol teknikal, sosel na ol menesmen hevi na bringim gut projek long kamap gut na ol stekholda i ken amamas.

Mista Zong i pinisim stadi bilong em long Shangdong Yunivesiti na i joinim bikipela kampani ol i kolim China Nonferrous Engineering and Research Institute na i wok stat long 1985 i go inap 2004.

Long 2005, ol i promotim em i go kamap fainensel menesa bilong China Nonferrous Engineering and Research Institute, na bihain em i joinim China ENFI Engineering.



Nupela Bod siaman bilong Ramu NiCo (MCC), Zhong Shao.

Oil Search kisim K2 bilien profit long LNG

OIL SEARCH Limited i kisim bikipela winmani inap long mak bilong K2 bilien long PNG LNG projek bihain long projek divelopa ExxonMobil i tokaut olsem projek i pinisim fainensel wok bilong em long tes bilong projek arensmen.

Dispela i opim rot bilong projek bai baim ol dinau, ol projek bai skelim winmani bilong LNG i go long ol long husat bai inap long kisim aninit long projek agrimen.

Oil Search i tokaut olsem em i mekim K2 bilien profit bilong LNG ges em PNG i bin salim i go aut long wol mak stat long mun Me, 2014.

ExxonMobil i tok kantri i salim pinis 65 kago bilong ges i go aut long wol maket. Tasol i no gat tok klia yet long hamas mani kantri i kisim. I no gat tok klia tu long hamas winmani ol Join Vensa Patna kampani bilong

LNG projek i kisim. Na i no gat tok klia hamas winmani ol patna bai kisim long dispela 30 yia LNG taim kantri i salim ges i go aut.

Menesing Dairekta bilong Oil Search, Peter Botten i tok kampani bai yusim winmani long skruim bisnis bilong oil na ges insait long kantri.

Mista Botten i tok em i gutpela nius long LNG projek i pinisim fainensel wok bilong em long givim aut winmani bilong LNG projek.

Ol seaholda bilong kampani i bin wet long kisim dividen o winmani taim LNG projek i skelim winmani tasol no gat tok klia yet wanem taim stret ol bai kisim.

Prais bilong oil long wol maket i pundaun na winmani bilong LNG projek bai pundaun na i no inap wankain olsem bipo we prais bin stap long US\$ 100 long wan wan barel taim PNG i salim namba wan ges long Me, 2014.

odit bilong 2013, stretim gut ol aset bilong kampani, rolim aut akaunting na putim operating sistem long sip bris long Madang na Pot Mosbi. Ol 5-pela sip bris long kantri nau i yusim wanpela teknoloji ol i kolim Klein & Teknoloji wan long mekim wok bilong ol isi.

Em i tok kampani bai skruim dispela teknoloji i go long olgeta sip bris insait long kantri. Em i tok Rabaul na Wewka bai kisim long Jun 2015.

Mista Poya i tok PNG Ports i bihainim stret rot bilong baim takis i go long gavman aninit long lo na i gat gutpela akaunting sistem na ol wokman bilong kampani.

Em i tok kampani baim K12.5 milien takis mani bilong 2011 i go long gavman na givim pinis ripot bilong 2012. Bai ol i pinisim ripot bilong 2013 na givim long gavman long Febueri 2015.

Mista Poya i tok long 2014 fainensel yia, kampani i baim takis long mani mak bilong K39.5 milien i go long gavman.

PNG Ports Limited em wanpela bisnis bilong ol pipel bilong PNG na gavman i menesim aninit long Stet On Entaprais na ripot i go long Independen Pablik Bisnis Kopresen.



PASIFIC DAWN: Ol bikman bilong Turis sip, MV Pacific Dawn, i bung long Madang Resort Hotel long kisim ol infomesen o toktok pastaim ol i statim lukluk raun bilong ol long Madang.

Madang Provins i wanpela provins long PNG we planti turis i save raun i go long en. Sip Pacific Dawn i bilong biknem bisnis man bilong Madang, Sir Peter Barter.

Poto: Madang Resort

PNG Ports tokaut long K51m profit

PNG Ports Corporation Limited i tokaut olsem kampani i mekim K51 milien winmani long 2014 bihain long em i baim olgeta takis i go long gavman.

Siaman bilong PNG Ports, Nathaniel Poya i tok ikonomi bilong kantri i gro strong na helpim kampani long kamapim dispela bikipela winmani. Em i tok winmani bilong 2014 i winim mak bilong 2013.

Mista Poya i tokaut olsem PNG Ports i gat gutpela menesmen na gutpela program long mekim mani na i kontrolim ol mani i go aut. Em i tok kampani i kontrolim rot bilong mani i go aut na putim long 6 pesen.

Em i tok dispela i helpim kampani long sevim planti mani na tu mekim planti mani long 2014. Em i tok wok bilong PNG Ports i kamap gut na i mekim planti mani long konstraksen taim bilong PNG LNG projek.

Mista Poye i tok gutpela menesmen bilong ikonomi aninit long O'Neill gavman em narapela nambawan samting na i helpim GOS Domestik Prodak long gro na helpim ol arapela sekta long gro. PNG Ports em wanpela bilong ol sekta we i lukim bikipela winmani long 2014.

Ol sampela gutpela kaikai PNG Ports i lukim long 2014 em kampani i pinisim wok

TAMPARA!

Air Niugini is proud to resume services to Aropa, Kieta.
3 Weekly Flights - Tuesday, Thursday and Saturday.

Effective
20th December
2014



Air Niugini

www.airniugini.com.pg
EXCLUSIVE CARRIER FOR THE 2015 PACIFIC GAMES

Call Toll Free on **180 3444** or contact your nearest Air Niugini Travel Centre or Travel agent for further details. Schedule - Tue & Sat: Pom-Kie (direct), Thu: Pom-Kie (via Rabaul).





Ramu NiCo Paiplain Tim Stretim Madang-Ramu Haiwe



Ramu NiCo i stretim tu Naru riva taim wara i tait na laik brukim bris.

WANPELA tim wokman bilong Ramu NiCo Paiplain Meintenens i wokim bikipela wok stret nau stap long Madang-Ramu Haiwe long stretim bagarap i kamap long nesenel rot klostu long Kawawar maket insait long Usino-Bundi distrik.

Dispela bagarap i bin kamap long las yia bihain long bikipela ren i lukim wanpela hap bilong dispela haiwe rot i bruk pundaun na lusim wanpela liklik hap tasol i stap. Dispela bagarap i givim bikipela pret long ol manmeri husat i ron long kar na PMV i go kam long Madang-Ramu Haiwe.

Dispela rot em nesenel haiwe na em i kam aninit long lukaut bilong Nesenel Woks Dipatmen na gavman i mas lukluk long stretim taim bagarap i kamap. Tasol Ramu NiCo Menesmen (MCC) i luksave olsem slari paiplain long en tu i

ron klostu long dispela haiwe na i givim bel tasol long helpim long stretim dispela bagarap i kamap long rot klostu long Kawawar Maket.

Dispela eria aninit long paiplain mak bilong Ramu NiCo em i stap long 40-Kilomita mak na wok i bin stat long Janueri 18 na i wok long go het yet.

Kampani i soim gutpela pasin tu taim em i kisim 26-pela lokal man long wok olsem kesuals o sotpela taim wok lain long helpim long pulumapim ston basket long karamapim eria we graun i bruk na pundaun.

Pasin Ramu NiCo i mekim i soim olsem kampani i gat gutpela luk-save long hevi long infrastraksa olsem rot long eria em i wok i stap long en na i yusim risoses bilong en long stretim hevi.

Kampani i yusim ol bikipela masin

bilong en long digim na klinim ples na bihain yusim bikipela kar long karim ol ston i go kapsaitim na ol kesual wokman i pulumapim ston basket long blokim graun long pundaun i go moa. Sapos dispela wok I no kamap na graun I bruk go daun bai Madang bai safa tru na ol lain long hailans bai nonap kisim buai go salim tu na planti sevis bai nonap kamap na wok divolopmen bai stop stret.

Ramu NiCo i soim olsem em kampani we i stap wantaim divelopmen bilong Madang provins na i laik helpim long taim bilong hevi i kamap long infrastrakta olsem rot ya.

Long las wik Fraide, Februari 8, Vais Presiden bilong Ramu NiCo, Mista Wang Baowen i bin sekim wok bilong ol lain i wok long rot long Kawawar taim em i ron long kar i go antap long KBK Main, na i

amamas long wok progres.

Ramu NiCo i kisim sampela lokal wokman olsem ol kesuals o lain bai wok sotpela taim long helpim long pulumapim ol ston long basket long putim na strongim graun we i surik. Dispela em bikipela wok stret, tasol Ramu NiCo i givim taim bilong en olsem gutpela koporet bisnis insait long Madang long stretim dispela rot we i save bringim sevis i go long ol pipel na komyuniti long provins.

Bikipela ren long Usino eria long pinis bilong las yia i kam olsem long dispela mun i kamapim planti hevi long kondisen bilong rot long Madang-Ramu Haiwe. Tasol gavaman I no save lukluk I go insait long stretim ol kain hevi we ol pipol I save kisim taim stret.

Stat long Janueri 5 i go inap 20, ol woklain bilong Ramu NiCo Paiplain Seksen i bin wokim bikipela wok tu long stretim ples we tait-wara i bagaraim wanpela bris long Naru.

Ramu NiCo i yusim ol masin bilong ol long digim na stretim ples na tu wokim ol ston-basket long putim long strongim arere bilong wara. Dispela bai stropim wara long brukim sait bilong graun na bagarapim dispel bris na ol gaden na ples i stap klostu.

Ramu NiCo i no tokaut yet long hamas moni em i yusim long wokim dispela tupela bikipela wok long Madang-Ramu Haiwe long sevim ol manmeri i go kam yusim dispela bikipela rot bilong Gavman.

Sapos Madang Provinsel gavaman na Nesenel Gavaman I gat gutpela save man na wisdom na bel long divolopmen bilong Madang na kantri bai ol I kamapim sampela baset moni long bai wok klostu wantaim Ramu NiCo kampani long mekim kamap Madang-Ramu Haiwei I kamap gutpela rot stret insait long kantri.



Ramu NiCo Vais Presiden Wang Baowen sekim wok ol wok lain i wokim



Wanpela sait rot long Madang-Ramu haiwe.

Ramu NiCo redi long givim

Insait long moa long tupela yia, Ramu NiCo i sanapim pinis malti bilian Kina Ramu Nikel Projek, na nau mipela i redi long komisinim.

Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikipela wok konstraksen long namba tu hap bilong 2008. I kam inap nau, olgeta bikipela konstraksen wok long Krumbukari main sait na Basamuk rifaineri i pinis, na projek i stap redi long kisim komisin o tok orait long mekim wok. Long wol tu, dispela kain hariap sanapim em i no kamap bipo long wanpela kain bikipela projek olsem, na i daunim olgeta

salens bilong graun na masin bilong mekim wok.

Ol dispela namba i soim klia mak bilong wok mipela i pinisim:

- Moa long 4.5 milian kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil bilding i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paiplain)

'Wanpela Ramu NiCo, Wanpela Komyuniti'

Tupela PNG NGO winim UNDP

TUPELA projek we ol komyuniti long PNG i go pas long ol i kisim namba long intanesenel level.

Tree Kangaroo Konsevesen Progrem long Morobe Provins na Tulele Peisa long Atonomas Rijon bilong Bogenvil i winim Global Equator Prais awod bilong Yunaitet Nesens Dvelopmen Program (UNDP).

Tupela ogenaísesen i bin kisim ol awod long Nu Yok, Amerika long luksave ol i givim ol long bikpela kontribusen ol i mekim long lukautim envairomen na daunim pasin bilong stap tarangu na klaimet senis eksen.

Samting olsem 121 kantri long wol i bin givim moa long 1,200

nominesen tasol tupela grup long PNG i bin mekim gut tru na winim top prais.

Tree Kangaroo Konsevesen Program i wanpela komyuniti konsevesen eria we ol asples yet i papa long busgraun na dispela em i namba wan kain projek olsem long PNG.

Projek i gat ol kain program long lukautim gut wara na ol pipel i ken yusim long helpim kamapim gut laip na sindaun bilong ol.

Konsevesen eria i karamapim 78,729 hekta graun na i lukautim ol wail plent, wail enimal we tri kangaroo o sikau bilong diwai i wanpela long ol.

Ogenaísesen i wok bung wantaim

praivet sekta na gavman long sevim na lukautim envairomen program na kopi projek we i kisim pinis moa long US\$20,000.

Ol i yusim mani ol i kisim long dispela program long ol komyuniti helt na edukesen projek.

Dispela projek i soim narapela kain komyuniti mobilaisesin na lidasip medol na dispela i namba wan taim ol wan wan grup i bung na wok wantaim long go hetim konsevesen na sastenabel developmen ajenda.

Tree Kangaroo konsevesen program i bin kisim tu Spesel Luksave Awod long Sastenabel Fores Menesmen.

UNDP long PNG i bin sapotim

Tree Kangaroo konsevesen program aninit long

Global Environment Facility Small Grants Program wantaim US\$ 50,000 grent mani long 2013 long sapotim wok bilong sevim ol baiodaivesiti o ol enimal na plent long distrik, na promotim sastenabel prektis bai helpim gut laip na sindaun bilong ol ples lain.

Long wankain taim, Tulele Peisa i bin kisim luksave awot olsem sempion bilong ol namba wan klaimet senis refuji program ol komyuniti yet i statim na ranim. Na i go pas long putim ol pipel long Carterets Ailan long Atonomas rijon bilong Bogenvil we solwara i wok long karim ailan bilong ol i go long

narapela seif hap long bikples Bogenvil.

Ol pipel i bungim hevi long solwara i karim ples bilong ol na ol i sot long kaikai n ol arapela hevi moa. Dispela NGO i go het na mekim wok long painim ples na salim ol klaimet senis refuji bilong Carterets Ailan i go long nupela ples long bikples Bogenvil.

Dispela wok we komyuniti beis ogenaísesen i wokim i soim gutpela model o piksa we ol arapela liklik ailan komyuniti long rijon tu i ken bihainim. Tu, i ken helpim long kamapim gut inta ailan tred, laip na sindaun bilong pipel.

UNDP bai holim ol seremoni long Lae na Buka long mun i kam.

Water PNG bai wok bung wantaim GDDA

WATER PNG i sainim Memorandum ov Agrimen (MOA) long wok bung wantaim Goroka Distrik Dvelopmen Atoriti (GDDA) long stretim wara saplai na suris sevis bilong ol.

Aninit long Nesenel Wata Saplai na Suris Ekt, Water PNG i gat pawas long saplaim wara na suris sevis long kantri tasol Goroka yet i save lukautim wara na suris bilong em yet.

Sif Opereting Opisa bilong Water PNG, Billy Imar, i tok olsem MOA bai kamapim wankain tingting long tupela pati long wok bung na opim dua long Water PNG long karim aut bikpela rivi bilong disain i stap nau, na operetim wara na suris sistem bilong taun long wanem bai isi long saplaim wara long bikpela populesen.

Sif Eksekyutiv na Menesing

Dairekta bilong Water PNG, Raka Taviri i tok dispela i gutpela agrimen bai helpim tupela pati long inapim driman bilong ol long sapotim ol bikpela invesmen long Goroka.

Mista Taviri i tok, as tingting bilong ol em long givim teknikel helpim na givim skul.

Em i askim ol long wok wantaim ol long save olsem ol i givim sevis long ol pipel bilong Goroka. Tasol em i tok wara i no fri long wanem, ol i mas baim long kamapim gut wok.

Long wankain taim, Bod Siaman bilong Water PNG, William N. Sweet i tok tenkyu long GDDA na tok em i driman bilong ol long stap long olgeta provins long PNG na Goroka tu. "Mipela i amamas long wok wantaim Distrik."

Long bekim, Sif Eksekyutiv

Opisa bilong GDDA, Andreas Lulue, i tok ol i gat wanpela tim bai lukautim sistem tasol ol lain i yusim wara i no baim wara long wanem ol bai stat long mekim ol baim. Dispela patnasip bai helpim menesmen bilong sistem.

Ekting Taun Menesa bilong Goroka Eben Lokal Level Gavman, Harold Abori, i tok ol i amamas long wok bung wantaim Water PNG. Ol i save olsem wantaim save bilong ol, ol i ken wokim kamap sistem na Goroka taun tu.

Mista Abori i tok moa olsem long salim wara go aut long ol hap em wanpela bikpela hevi. Long dispela bai ol i sapotim dispela patnasip.

Projek i bai kamap taim ol i sainim MOA na taim ol Atoriti i givim mani. Na GDDA bai givim leta bilong statim wok wantaim ol narapela samting long Water PNG.

Kiau bilong wail paul o bus kakaruk i win tru...

Dispela ples we ol i tok 'yu no save, yu yet go na lukim' i gat planti kain kain abus i stap. Yu yet kolim, abus bilong nambis, abus bilong solwara, fres wara na bus tu em ol i stap.

Na long dispela mama Helen Sase (long poto) bilong Yagana hauslain long Okapa distrik long Isten Hailans husat long namba wan taim i go raun wantaim famili bilong em long Savaiviri viles long Malalaua distrik bilong Galp provins, dispela ol kiau bilong bus o wail paul i paulim em.

Em i ting olsem dispela em ol kiau bilong pukpuk. Na long painim aut, taim ol ples lain i praim 20 kiau long praipan, em i teis nais tru, na winim tru ol kiau bilong kakaruk tu ya.



Mama Helen Sase wantaim ol wail faul kiau.



KABIS PULAP: Ol naispela kabis mama ya i salim i stap long Koki Maket, Mosbi.



KUKA: Planti nambis ples long kantri i gat ol kuka, olsem dispela lain bilong ples Savaiviri, Galp Provins. Long kuka sisen, ol pipel i save mekim gutpela mani long salim ol kuka long maket. Poto: Sape Metta

Nane painim ples long ring

Nicky Bernard i raitim

TAIM em i liklik mangi na gro long Erave long Sauten Hailens. David Nane i no driman long kamap wampela Intanesenal pait man. Taim em i kamap long Mosbi tu, em i no tingting long kik pait long ring. Em i save raun nating wantaim ol wan ples bilong em.

“Mi save bihainim ol mangi na go lukim ragbi we i wampela spot mi save bihainim taim mi stap long Mosbi” Nane i tok.

Long 2008 em i go lukim sempion kik boksa, Stanely Nandex, taim em mekim las kik pait bilong em long PNG.

Nandex i bin pait wantaim Nu Silan man Chris, “White Sniper” long holim taitel bilong em yet.Nane i bin lukim wampela

kik White Sniper i mekim, na dispela i mekim skin bilong em i kirap long traim dispela pilai bilong kik boksing.

Long dispela yia yet bihain long em i lukim dispela kik pait namel long sempion kik boksa Nandex, em i go long klap bilong em na putim nem long trening long kamap wampela kik pait man.

Nane yet i gat liklik save long taikwando bihain long em i lainim long skul bilong Stones Taikwando klap long Mosbi. Dispela i mekim isi stret long Nane long trening bilong em long kamap kik boksa insait long tupela yia.

Long 2009 em i bin makim NCD long PNG Gems long Mosbi na long 2012 tu em makim NCD long go pilai kik pait long Kokopo. Bihain long

dispela, Nane i no moa luk i go bek,nogat. Em i wok hat long tening na pait na em i go daun long Australia.

Nane i save tren long F16 Onyx Gym long Cairns long kamap wampela profesenel kik boksa.

Em i save tren aninit long Francis MacDonald em papa bilong dispela gym. MacDonald i save go kam long PNG long sampela kik pait.

Nane i save tren na sampela taim, em save raun insait long Australia na kik pait wantaim ol narapela klap pait man long Australia.

Nane i no save toktok planti tasol em i save stap isi.

Tasol em mekim rot bilong em yet long kamap wampela profesenel pait man bilong kantri bilong yumi PNG.



BSP Skul Kriket namba wan junia sempionsip long Milen Be

Stori i kam long PNG Kriket Asosiesen

BANK South Pacific Kriket Program i wok long kamap gut insait long kantri na wampela bilong ol em wampela junia sempionsip i kamap namba wan taim tru long Milen Bei Provins.

Ahioma Kriket Asosiesen bilong Milen Bei i bin statim namba wan taim junia sempionsip resis long 17 Desemba 2014 na pinis long 31 Januери dispela yia.

Insait long dispela resis i bin gat ol skul sumatin husat i bin kisim ol klinik bilong BSP Skul Kriket Program.

Foapela tim i bin resis insait long dispela program na ol i bin kam long tripela divisen, anda 13 pikinini man na ol meri, anda 15

na anda 19 boi had bol divisen. Aninit long ol dispela divisen 11-pela tim i resis wantaim 15 ova gem insait long anda 19 divisen pilai.

Presiden bilong Ahioma Kriket Asosiesen Amua Burama, i tok tenkyu long man i go pas long dispela resis program. Em i tok Simon Deiwillie i ranim dispela resis gut tru na em i tok moa long ol olsem junia kriket pilai bilong provins long ol i mas kisim moa eksperiens long pilai kriket.

“Dispela resis em i hap bilong Kriket PNG plen long developim ol yangpela kriket pilaia insait long kantri na wantaim sapot bilong BSP moa yet em i kamapim rot bilong ol junia kriket pilaia long kamap ol senia pilaia long bihain,” Simon Deiwillie, Rijinol Kriket Menesa

bilong Milen Be Provins i tok.

“Dispela resis bai kamap nau olgeta yia insait long Kriket Asosiesen na luk olsem dispela yia bai planti moa tim bai kam insait,” Mista Dewillie i tok.

Mista Dewillie i tok ol arapela Kriket Asosiesen long provins i lukim resis na i wok long tingting long kirapim ol wankain resis bilong ol yet insait long dispela yia.

Dispela resis i bin go gut tru wantaim ol Krismas holide na i pinis gut wantaim ol tropi i go long wina tim na tim i lus wantaim aninit long wan wan divisen.

Kriket PNG Skul Developmen Program long las yia i bin gat tenpela Kriket Rijon wantaim BSP Skul Kriket Program. Em i gat 162,483 pilaia. Na tu BSP Skul Kriket Blast i stap long 10-pela rijon, 31 kanival, 108 resis na 4480 pilaia.

Madang kriket i go pas long ol PNG distrik

KRIKET long Madang i wok long ran gut long kamapim namba wan provins long i gat wampela distrik tim long go insait long ol pilai bilong Kriket Asosiesen long taun.

Madang Rijonal Kriket Menesa Paul Sibeth, i tok em i plen long wampela tim bilong Sumkar Distrikt long go insait na pilai long Madang Kriket Asosiesen long dispela yia.

“Wantaim BSP’s Skul Kriket Program, mi inap long luksave long planti gutpela yangpela lain insait long distrik long praimer na elementri skul. Mi ting ol i ken kamapim wampela distrik tim long stap insait long taun resis,” Mista Sibeth i tok.

“Em i tru olsem i namba wan taim tru long wampela distrik bilong kriket spot ausait long ol narapela rijon we ol i save pilai kriket long kantri,” em i tok.

Sibeth i tok wantaim sapot bilong Kriket PNG em i laik lukluk long ol narapela distrik long kam insait long BSP Skul Kriket Program na bringim nupela lain kam insait long dispela spot.

Presiden bilong Madang Kriket Asosiesen, David Lloyd i tok em i bilip olsem developmen bilong Madang na PNG long bihain, olsem pilai spot i givim planti sans long planti ol junia long lukim olsem i no long mekim rong tasol bai ol i ken kisim gol o mak bilong ol.

“Pasin bilong trenim, lainim ol rul o lo na bihainim pasin bilong disiplin em i as bilong kamap namba wan insait long spot fil. Em i mak bilong kamap wina long ol narapela hap bilong laip bilong yu tu. Yu ken kamapim moa pren na i ken kamapim wampela netwok bilong spot long ol yangpela.” Mista Lloyd i tok.

Em i tok long sampela taim nau, Kriket PNG i save holim ol Skul Kriket developmen program (BSP Skul Kriket Program) long Madang, we Newtown C.C. kepten Paul Sibeth i save kodine-tim. Paul i gat bilip olsem sampela ol sumatin husat i stap pilai long dispela program i redi pinis long go long ‘hat-bol’ kriket. Na wantaim dispela tingting em bai kamapim wampela anda 17 olupela tim long wok wantaim ol bikipela lain insait long 21015 Madang Kriket Asosiesen sisen.

Leo Berka Kos bilong Madang Kriket Asosiesen i tok,“Ol pilaia bai putim ol klos i karamapim ol gut, na ol ampaia bai kisim tok save long ol i no ken tromoi sampela bol bai i ken bagarapim ol junia pilaia.“Taim mipela i mekim olsem, mipela laik mekim rot bilong ol skul kriket i go long senia kriket, na long ol bai rot i klia olgeta i go long ol Barra-mundi, sapos ol pilaia i gat gutpela stail,” em i tok.

Stori bilong Steven Kari i no klia tumas nau

i kam long pes 28

“Mipela i no laik bagarapim Steven o fosim em long kam long mipela, tasol mipela i laik traim long soim yupela long wanem samting ol ripot bilong rekot bilong em i soim mipela,”

Sir John i tok.Kari i no bin go bek gen long instituit long taim em bin kam bek long Glasgow las yia bikos em i tok em i laik stap bek long 50 yia betde bilong mama bilong em.

Bihain long dispela em i no bin traim long go bek gen olsem na ol PNGWF i bin traim painim em planti taim tasol ol i no bin kisim em liklik.

Coffa i tok, Kari i bin go na lusim em tupela taim pinis na em bai i no inap

kisim em bek gen long namba tri taim.

Em i tok sapos Kari i bin laik stap bek wampela moa wik long betwe bilong mama bilong em, em bai larim em tasol em i no bin toksave gut. Nau em stap foapela wik pinis.

“Long weit lifting spot, dispela kain taim olsem 4 wik em i longpela taim tumas na em bai mekim trening bai hat long em long go bek long mak we em i stap long en pinis,” Coffa i tok.

Ol i traim yet long kisim em bek tasol nau yet Kari i wok long wokim trening bilong em yet aninit long pastaim PNG nesenel kosa, Douglas Mea we em i bin statim weitlifting long en.

Stori na poto i kam long PNG Kriket Asosiesen





Kepsen: Masin i glasim bagarap bilong Dugan na nius i gutpela
Em i orait long Josh Dugan long go ovasis long pilai long Wol Klap pilai siris bilong ol Dragon.

St George Illawarra Dragons amamas olsem Josh Dugan i no kisim bikpela bagarap.

St George Illawarra i amamas bihain long sekim long haus sik i soim olsem bagarap we Josh Dugan i bin kisim long ni bilong em i no bikpela na em bai pilai.

Orijin pilai bilong New South Wales i no bin wokabaut gut long las Sarere Sariti pilai egensim South Sydney, na ol i bin pre tem bai no inp pilai long stat bilong NRL sisen. Tasol ol i kliarim em na em bai go long UK long dispela wik long pilai long Wol Klap pilai sieis egensim Warrington.



Kepsen: Jonathan Thurston i lukluk i go:
Ol Cowboy i gat plen long ko kepten bilong
ol bai malolo sapos ol i statim gut NRL.

NRL All Stars: Jonathan Thurston i sapotim pilai long Gold Coast maski ol i no salim gut ol tiket.

Ol tiket bilong ol All Stars i no go gut i mekim Jonathan Thurston i kirap no gut, tasol dispela sempion i bilip strong olsem ol samting i karamapim pilai bilong NRL i gat sapot long Gold Coast.

I kam inap nau na bipo long pilai long tumora, ol i salim tasol 9,000 tiket. Pilai bai kamap long Robina Stadium we NRL All Stars na Indijinis All Stars bai pilai long en. Dispela Stadium i ken kisim 27,000 pipel. Dispela i kamapim wari long ol pri sisen pilai bai kamap long bihain taim long dispela turis ples.

Manchester United na West Ham i dro long eksta taim, Stoke City na Newcastle i dro na Burney na Wes Bromwich i serim poin.

Primia Lig long Mande i bin lukim Manchester United na West Ham i dro long 1-1 mak, bihain ol i bin givim ol ekstra taim. Daley Blind bilong Manchester United i bin kikim bal we i kamapim dro long tupela tim.

I bin luk olsem midfilda bilong Senegal, Cheikhou Kouyate husat i bin pilai olsem oksileri senta bek i bin mekim na tim bilong em i win, bihain em i bin kontrolim fri kik bilong Mark Noble long namba 49 minit. Tasol Blind i bin stap long arere na klkotu long pinis bilong ekstra taim, kik bilong em i bin kamapim dro.

I bin wanpela eksen pilai na ol sapota bilong tupela sait i bin gat gutpela taim long lukim pilai.




Enner Valencia bilong West Ham i takolim Daley Blind bilong Manchester United.
Daley Blind i kam bihain we i kamapim dro na sevim Manchester United.

Tes i kliarim ol kendidet i ran long FIFA presiden kendidet

Tes i kliarim foapela kendidet i sanap long FIFA presiden long resis long Me ileksen, gavaning bodi bilong soka i tok. Ol i pasim tes long gutpela pasin sekim.

FIFA i tok ol i konfemim ol dispela lain long sanap resis long posisen.

Sepp Blatter nau presinden i sanap long namba 5 taim, Luis Figo em pastaim fowed bilong Portugal, Dutch FA presiden, Michael van Praag na Prins Al Hussein bilong Jordan.



Ol poto:
Nicky Bernard



TOKSAVE: Salim ol spots dro bilong yu kam long Feks; 325 2579, e-mel; sporwol@wantok.com.pg o kam lusim long Wantok Niuspepa opis long Able Building Complex long Central Waigani, NCD.

IMPROVED TASTE! Niupela teist wantaim planti mit na oil. Teistim na bai yu laikim moa yet.

DIANA

Tuna



Emi tuna
bilong PNG

PROUDLY
PNG
MADE

Manufactured by:



RD Tuna Canners Ltd.

Moa mit na
oil insait



DIANA Blu

TUNA IN OIL

Stori bilong Steven Kari i no klia tumas nau



PASTAIM trena bilong Steven Kari, man husat i winim gol medal long las yia Komonwelt Gems long Glasgow, i tok em i no gat bilip nau olsem Kari bai winim wanpela gol long dispela 2015 Pasifik Gems.

Mista Paul Coffa husat i save givim gutpela tingting long Mista Kari inap long taim em i winim gol long Komonwelt Gems i tok, long taim Kari i bin kam bek long Glasgow long 2014 we em i bin winim gol medal, em i no bihainim gutpela trening program.

"Steven Kari bai i no inap winim wanpela gol medal long Pasifik Gems sapos em i stap yet hia long PNG, na sapos em i winim wanpela medal, em bai i no wanpela gol," Mista Coffa i tok.

Em i tok Kari i gat planti gutpela strong insait long em long winim wanpela gol medal long Olimpik Gems tu tasol em i tromoi olgeta

dispela taim em i les long go bek long Oceania Weillifting Institiut we em i bin save kisim trening bilong em long 4-pela yia pinis.

"Sapos Steven i no laik kam bek long Institiut, mi bai i no inap long fosim em tasol bai mi ken tokim yu olsem em bai i no inap winim gol bilong PNG.

Steven i bin stap wantaim me inap long 4-pela yia, em i bikpela taim tumas na mi putim bikpela taim tru long wok wantaim em. Mipela i bin lukim kaikai bilong wok bilong mipela. Mi bin mekim wok bilong mi, tasol em i mas luk-save long dispela hariap na sapos no gat em bai lus olgeta," Mista Coffa i tok.

PNG Weillifting Federesen Presiden, Sir John Dawanicura i tok Mista Kari i no save go long ol Hai Pefomens trening bilong tim long olgeta wik. Olsem na em i pret olsem no gut bai em i no inap go insait long tim taim ol i wokim seleksen.

Hai Pefomens Divisen i save holim ol trening rekot na stori bilong wan wan spot man na em bai ol i yusim long sapotim seleksen bilong fainel tim. Tasol Kari i no bin wok long go long ol dispela trening sesen olsem na em bai gat hevi nau.

"Mipela i no inap long fosim em long kam long trening wantaim ol narapela, em laik bilong em tasol ol dispela toktok em olgeta lain i mas save," Sir John i tok.

Em i tok olsem ol toktok bilong Coffa long Kari i kam long ol mak na stori bilong ol trening bilong em.

moa long pes 25

Poto: Stevem Kari

Mitsubishi FUSO Rosa Bus



Apgred ensin
130Hp
4 silinda disel



PIKSA EM BILONG ILLUSTRASIN WOK TASOL

**Ikamap Wantaim
26 na 30 Sit**

Hariap nau na go long
Boroko Motors dila bilong yu

**BOROKO
MOTORS**

Port Moresby ph: 325 5255 | Lae ph: 472 1144 | Mt Hagen ph: 542 1933 | Tabubil PH: 649 9048
Kimbe PH: 983 5035 | Madang PH: 422 2659 | Kokopo PH: 982 8193 | Goroka PH: 532 3552

Email: info@borokomotors.com.pg
Website: www.borokomotors.com.pg

